



臣王先謙敬編
臣周潤蕃恭校

秋七月己酉朔裁貴州貴陽府分駐長寨同知屬吉羊枝土千總

○庚戌刑部尚書和瑛卒贈太子太保賜祭葬諡簡勤○調那彥

成爲刑部尚書松筠爲吏部尚書晉昌爲兵部尚書以穆克登布

爲理藩院尚書田部統遷○辛亥調那彥寶爲吏部左侍郎廉善爲刑

部左侍郎○癸丑諭惇親王長子奕繼於初四日酉刻殤逝奕繼

會經承侍 皇考歡顏且朕見在止此一姪遽焉天折朕心實爲

憫悼著加恩追封貝勒其身後一切事宜著派內務府大臣禮恩

妥爲經理不必行知各該衙門俱由內務府備辦本日午刻派大

阿哥前往賜奠以示矜恤○免雲南夷匪滋擾之趙州等六十一

東華續錄 道光四

廳州縣舊欠銀米並永北廳額銅○乙卯成書卒調穆彰阿爲戶

部右侍郎轉阿克當阿爲工部左侍郎以果齊斯歡爲工部右侍

郎署戶部右侍郎○己未張文浩丁憂命嚴烜以三品頂帶署河東河道

總督由河道署○庚申定 東陵 西陵總管五年更換例○辛

酉添設侍衛處實缺主事二委署主事一○壬戌吳烜以病免以

初彭齡爲禮部右侍郎署禮部左侍郎○禮親王麟趾薨命散秩大臣張

涇帶領侍衛十員往奠茶酒予祭葬諡曰安○丁卯江西巡撫瑋

弼卒予祭葬○調毓岱爲江西巡撫以楊懋恬爲湖北巡撫調廉

敬爲江蘇布政使以德奎爲湖北布政使惠顯爲安徽按察使出

鳳道遷○己巳兵部侍郎吳其彥因父病請解任允之○庚午 上

奉 皇太后啓鑾謁 西陵○免經過地方額賦十分之三○諭

前定於二十日啓鑾恭詣 昌陵行周年大祭禮自十八日大雨

連宵達旦朕冒雨起程行至西安門因前途橋梁衝損暫行還宮
本日途次復值大雨朕衝泥跋涉行次黃新莊 皇太后安輿不
能前進已自中途回鑾據御前大臣軍機大臣合詞籲懇暫行旋
蹕朕未允所請令御前侍衛安福乾清門侍衛容照並總督方受
疇查看前途道路據稱良鄉以南積水汪洋數十里泥淖陷深人
馬不能駐足若俟積水消退已不能如期盡禮賽沖阿等復具摺
諄懇朕灑淚忍痛勉從所請於二十四日還京派瑞親王前詣

昌陵恭代行禮此朕萬不得已之苦衷諒荷 皇考在天昭鑒也

○辛未以杜堦爲兵部右侍郎學士內閣○癸酉諭史致光奏首逆
傅添貴就擒照例辦理一摺傅添貴係首先過江肆擾大姚之犯

永北大姚兩處早經肅清惟該犯潛匿稽誅此次經派緝之千總
趙鵬等在龍潭山頂搜獲該犯逞兇拒捕被馬兵張連仲用矛戳

東華續錄

道光四

二

傷滾崖就擒移時身死經該督委員查驗確實判屍梟示緝捕甚
爲認真千總趙鵬已加恩以守備卽升馬兵張連仲著以外委卽
行拔補以示獎勵○加賑甘肅甯夏等四縣水災旱災並免上年
額賦

八月己卯以海齡爲刑部右侍郎候補侍郎○以時疫流行發銀三千

五百兩分給五城及大興宛平二縣製備藥料棺槨○肅親王永

錫薨命貝勒蘇譽帶領侍衛十員往奠茶酒賞銀五千兩治喪予

祭葬諡曰恭○庚辰諭本年八月天氣尙覺暑熱京城內外兼有

時疫流行因念貢院中號舍湫隘士子等萃處鬱蒸恐致傳染疾

癘非所以示體恤今科順天鄉試著展期一月於九月舉行該衙

門卽行曉諭俾眾咸知○丁亥命吏部尙書松筠在軍機大臣上

行走○癸巳兵部尙書茹棻卒予祭葬○以初彭齡爲兵部尙書

戴聯奎爲禮部右侍郎

由大理寺卿遷

○甲午

上臨故肅恭親王永錫

第賜奠○定兩湖隨營世職輪補守備例○乙未浙江巡撫帥承

瀛奏漕賦爲天庾正供關繫甚重邇年以來弊竇叢生其始由州

縣之浮收以致幫丁之需索而沿途之陋規使費亦因而逐漸加

增迨幫丁用費愈大需索愈多各州縣亦率爲幫費所迫有不能

照例徵收之勢而耗費究歸於小民因之包戶侵漁刁衿挾制皆

由此起積弊相沿挽回無術是以兩江督臣孫玉庭有八折收漕

之議原以去其太甚補救目前無如因弊立法而弊卽因法以生

誠有如在廷諸臣所議者茲仰荷訓示令漕運總督倉場侍郎嚴

禁官役需索使費俾沿途之陋規盡除卽幫丁之用費可省而州

縣浮收勒折之弊復飭各督撫實力查禁洵爲截流清源之良法

惟有懷遵諭旨飭屬奉行庶愛民恤丁可期兩有裨益得旨所奏

東華續錄

道光四

二

皆是但要實力奉行不可日久生怠○甲辰以唐仲冕爲陝西布

政使調陶澍爲福建按察使程贊清爲山西按察使以景謙爲貴

州按察使

由雲南遷

○調誠端爲陝西按察使陳廷桂爲江蘇按

察使○丙午調張師誠爲安徽巡撫孫爾準爲廣東巡撫

九月己酉諭國家定制登極後卽應選擇萬年吉地嘉慶元年奉

皇祖高宗純皇帝敕諭嗣後吉地各依昭穆次序在 東陵

西陵界內分建今朕紹登大寶恪遵 成憲於 東陵界內選擇

繞斗峪建立吉地著派莊親王縣課大學士戴均元尙書英和侍

郎阿克當阿敬謹辦理諏吉於十月十八日卯時開工○諭秦承

業前在上書房行走學問尙優人亦爽直朕履位之初卽宣召來

京加以遷擢仍令在上書房行走冀其有所匡助及今半載有餘

其所敷陳非迂闊難行卽執謬不通率皆市井之談昨據汪廷珍

奏伊在上書房言語不謹及加詰問汪廷珍不肯指實因降旨令秦承業不必在上書房行走嗣後召詢惇親王瑞親王初亦未肯直言經朕反復開導再三詳詢二王無可如何始據稱秦承業曾責備顧臬督責大阿哥所言甚爲荒誕狂悖因令軍機大臣等面問大阿哥亦稱實有其語上書房爲養正之地爲師傅者應以孝弟睦友慈愛時加訓迪今秦承業如此老詩若不加以懲創何以示誠秦承業著革職卽令回籍此係朕從寬懲辦若按名定讞則罪在不赦矣汪廷珍顧臬旣聞其言卽應據實參奏乃汪廷珍陳言含糊顧臬則並未具奏均屬不合著罰俸半年以示薄懲秦承業係朕特召用之人乃身在內廷肆言無忌朕知人不明實不能不引以爲愧也○免河南蘭陽儀封二廳被水應賠倉穀○免綏遠城渾津黑河莊頭未完米石○庚戌裁貴州安順府屬土守備

東華續錄

道光四

四

土千總土把總各一土外委二○辛亥追封 孝穆皇后父原任戶部尙書布彥達賚三等公母吳雅氏爲公妻一品夫人○癸丑諭給事中盛唐奏檢拾匿名揭帖請飭拏究辦一摺甚屬非是律載匿名文書告言人罪見者卽爲銷毀若將送入官者杖八十官司受而爲理者杖一百被告者雖實不坐定例久經著明嘉慶二十三年復奉 皇考仁宗睿皇帝諭旨以匿名揭告最爲風俗人心之害凡有黏貼匿名揭帖卽將原帖銷毀不准具奏惟關繫國家重大事務者密行奏聞是惟叛逆重情乃准入告此外皆應遵 旨銷毀 聖諭煌煌至爲嚴切該給事中豈無見聞乃以匿

名呈控土棍細故違例具奏除所告無庸查辦外盛唐著交部議處尋議革職命加恩仍以編修用○以鄭裕國爲江甯布政使蘇明阿爲廣東按察使

由浙江
糧道遷

○己未召斌良來京以祥德爲河南

按察使田江甫江○癸亥以嵩溥為廣西布政使常德為湖南按

察使田直隸熱河○戊辰暹羅國王鄭佛遣使進香貢方物温諭止

之○己巳召長齡來京陛見以朱勳署陝甘總督盧坤署陝西巡

撫由甘肅布政使署○乙亥福建巡撫顏檢奏閩省歲進荔支樹素心蘭

二種採辦運送情形得旨荔支樹素心蘭二種措辦匪易乃朕素

所深知而又係無用之物故去歲特降旨將其停貢彼時內務府

未能明白傳諭似俟三年後仍行照舊呈進朕意原是永行裁革

此時不便再行宣示汝當遵此硃諭嗣後二項永遠不必呈進汝

能如此直陳朕甚嘉焉○是月賑安徽宿州等三州縣水災

冬十月己卯 上御乾清門聽政自是以為常○以奎照陳嵩慶

俱為內閣學士兼禮部侍郎銜奎照由詹事遷陳嵩慶候補內閣學士○召曹六興

來京以陶澍為安徽布政使蘇兆登為福建按察使田江甫淮揚道遷○

東華續錄

道光四

五

壬午諭嗣後考試繙譯奏派左右翼副都統帶兵彈壓著為令○

癸未移湖南岳州府同知及水師營守備駐君山○乙酉截留江

蘇解部銀三十三萬餘兩及淮徐兩屬漕糧備賑○丙戌轉果齊

斯歡為工部左侍郎調裕恩為工部右侍郎以明志為理藩院右

侍郎由太常寺卿遷○丁亥調孫爾準為安徽巡撫以嵩孚為廣東巡撫

阿霖為浙江布政使田直隸按察使遷○除河南孟津縣河占地賦○戊

子移四川太平廳同知駐城口添設訓導照磨各一移原設城口

經歷駐高觀寺場復太平廳為太平縣設知縣訓導典史各一均

歸綏定府轄裁筠連縣訓導缺改巫山縣屬之大昌汎千總為守

備裁大壩營守備缺撥太平營千總一駐通江縣屬之竹峪關移

陝西鳳翔通判南星巡檢駐甄坪添設蓋屋略陽縣丞各一裁甄

坪縣丞並華陰縣丞缺添設湖北鄖陽府同知訓導照磨各一駐

白河口裁德安府通判司獄並保康縣訓導缺改宜昌府司獄爲竹谿縣豐谿巡檢移房縣板橋巡檢駐輒磨坪○命修造京城內空地房屋給內務府三旗貧戶居住○調常德爲直隸按察使蘇

明阿爲湖南按察使陳中孚爲廣東按察使以戴三錫爲四川按察使

由建昌○移福建霞浦縣杯溪巡檢駐三沙○乙未葉世倬

因病賞假以岳良署山西布政使由按察使署○庚子命江西南安贛

州甯都三府州遣戍流徒各犯由巡道就近審勘○辛丑命中外

營員認真訓練○飭道府提訊所屬控案○甲辰諭本日有兵部

筆帖式和書在乾清門呈遞奏摺自陳管見五條朝廷設官分職

定有等差不容越分言事其末職下僚如有確知利弊及冤抑求

伸者或在都察院申訴或在本衙門呈遞該堂官亦斷不敢壅於

上聞若不論品秩崇卑紛紛競赴宮門建言奏事尙復成何體制

東華續錄

道光四

六

此次筆帖式和書所遞條陳尙無悖謬之處但違例擅遞奏章著

交刑部治以應得之咎○丙午以佛住爲盛京兵部侍郎由庫爾喀

蘇領隊大臣遞

十一月甲寅以故禮親王麟趾孫全齡襲爵○乙卯頒 御製聲

色貨利論曰孔子曰放鄭聲書曰比頑童時謂亂風又曰不役耳

目百度惟貞玩人喪德玩物喪志記曰姦聲亂色不留聰明淫樂

慝禮不接心術由是觀之聲色之爲害大矣因思我朝定制皇子

皇孫均於六歲入學讀書凡聖賢之所言自幼無不誦讀講肄以

爲修身立志之本其奈終身抱道克己復禮者甚難蓋知之非艱

而行之艱也在常人猶不可不檢束身心屏除聲色爲人君者尤

當以禮自防毋爲所惑常人惑之害及一身人君惑之害及天下

敬思朕受 皇考教育付畀深恩欽承 密諭必當力除此弊有

損無增茲難於槩行除卻者實朕之苦衷不能以言喻之也後世子孫若能體朕之心法朕之行成朕未竟之事造次無忘不邇聲色之諭卽我大清萬世天下臣民之福也其後宮嬪御之制簡約詳明無庸復贅遵而勿改可也孔子曰百姓足君孰與不足百姓不足君孰與足宮中府中原屬一體非同士庶之私自蓋藏也故人君不可有私財有私財必有私事有私事必有私人有私人則不爲其所愚者鮮矣是以貨利之害尙小而立身行政之害大矣我朝立法嚴明言利之臣立加貶斥惠民之政不惜帑金故任土作貢自古有之惟是行之旣久未免世俗相因漸生侈靡要在爲人上者知稼穡之艱難力崇節儉返本還淳然節儉之風豈空言所能感化也務在身踐力行槩從樸實尙虛文卽向應入貢者亦必察其義之所在定以限制不可稍存自奉之心在詔諫者必

東華續錄

道光四

七

曰尋常之物非珠玉可比價廉值賤獨不思一絲一粟從何而出哉且由數千里而來以至達於九重其費不知凡幾矣故省一分天下陰受一分之福於吏治民生不無小補哉至於亭臺苑囿夙有規模滄樸之風盡美盡備足以供幾餘遊憩其可復待經營乎書曰峻宇彫牆又曰惟宮室臺榭陂池侈服不可不引爲龜鑑也卽以當時而言每歲應修應理者卽不能及時措置何暇復有所加增乎設遇容悅之臣侵漁之吏多方獻諛取巧逢迎主意則必曰內廷之興造不同往昔今則自內發帑募夫並非勞民力傷民財而成之也此乃我大清萬世之罪人卽應立正典刑暴白天下試思府庫之藏來自何所耶變其名色分其出納又將誰欺乎嗚呼仍是吾民脂膏也設非壇廟宮室城郭官署又何忍以有常之費恣意消耗於無用之地耶我後世子孫若不遵循舊制縱

欲無厭或有讒佞變惑罔顧是非當時之滿漢大學士軍機大臣都察院堂官暨科道等卽持朕諭交章進諫若諫而弗納則爲君者甘爲祖宗之罪人臣工無與焉若不能犯顏強諫惟知自顧身家苟且旁觀尸祿保位則是自外生成爲萬世不忠之臣矣著將此諭交內閣軍機處都察院各錄一道慎密存記特諭○辛酉諭英和等議駁武隆阿等奏請各省綠營馬兵分半作爲旗缺並令駐防子弟一體挑補綠營守戰馬糧一摺所議甚是我朝定鼎以來以八旗滿洲蒙古漢軍屯駐京師以綠營兵隸督撫提鎮分駐各省其緊要地方更設立駐防旗營統以將軍都統副都統城守尉立法至爲周密見在八旗生齒日繁未嘗不籌其生計量爲調劑若以旗人挑補綠營兵缺復以在京旗人往補駐防兵缺無論兵丁得項本微攜眷遠行諸多不便且從此不復回旗是以百數

東華續錄

道光四

八

十年參養之旗人無故屏之遠土朕何忍焉其忠愛固結之忱豈能使之忽然至綠營兵丁平日在營差操倚餉爲生一旦遽撤其半亦何能使之帖服素舊制而失人心莫此爲甚武隆阿秀莖均著交部嚴加議處以爲莠言亂政者戒尋部議革職得旨武隆阿著加恩降爲二等侍衛仍留參贊大臣之任秀莖著加恩降爲藍翎侍衛仍留幫辦大臣之任俱帶革職留任處分八年無過方准開復○諭軍機大臣等武隆阿等奏英吉利夷人給葉爾羌阿奇木伯克遞字求來貿易買馬見經駁斥一摺英吉利係海外夷人向在廣東貿易溫都斯坦一帶地方並非伊國泊船口岸今愛孜圖拉執有夷字據稱係英吉利頭目果迺爾展轉所遣要到西北一帶買馬貿易並欲到布噶爾地方先來給葉爾羌阿奇木伯克邁哈默特鄂散遞字求向葉爾羌喀什噶爾一路行走武隆阿等

合邁哈默特鄂散以己意作字駁斥所辦甚是至所稱英吉利據有溫都斯坦已五六十年其旁克什密爾音底亦皆聽從等語外夷部落荒遠難稽疆圍以外原可置之不問惟葉爾羌英吉沙爾喀什噶爾一帶卡倫均與外夷接壤地方緊要總當留心稽察嚴密防範不可大意武隆阿見已飭向在葉爾羌貿易之克什密爾回人分起探訪其事該夷人究有多少其來意何居一俟探有確情卽行迅速奏聞○王戊以河防又安加江南河道總督黎世序太子太保賜御製詩章○己巳諭軍機大臣等文幹等奏哲孟雄部長來藏熬茶妄求地方人口嚴行駁斥遣回並擬定該部長來藏年限一摺哲孟雄部落在唐古特邊外從前福康安進剿廓爾喀時曾檄令該部長乘勢進攻收回被奪之地該部長觀望不前及事定之後屢次妄行祈求均經駁斥今來藏熬茶又向噶勒

東華續錄

道光四

九

丹錫呀圖薩瑪第巴克什稟懇或賞給帕克哩營官之缺或將所屬卓木族卓百姓及卓木雅納綽松百姓賞給管理該部長貪鄙無知竟敢妄求藏地所屬職官民人交伊管理文幹等飭令該喇嘛嚴行駁斥以絕其妄念仍酌賞銀物以示體恤所辦俱是該部長向准來藏禮佛文幹等因其每次來藏輒多乞請擬定或五年或八年來藏一次以示限制著卽以八年爲限但所定年限乃杜其非時前來若屆期不來亦聽其便如未至八年卽行斥駁至邊防理宜嚴密如該部長稟請來卓木避暑時自當隨時批駁飭江孜守備帕克哩營官等小心防範以安邊圉○庚午移湖南辰谿汛守備駐大油谿並撥把總外委各一帶兵駐守○壬申允廷臣

請編

御製養正書屋詩文全集

十二月戊寅以故肅親王永錫長子敬敏襲爵賞第三子敬效委

散秩大臣○辛巳先是 皇朝文獻通考於朝鮮國殺其議政金

昌集中樞李頤命左議政李健命判中樞趙泰采據該國報書謀

逆伏誅至是國王李瑛奏言四臣之死因李昉病廢無嗣議令李

昉爲世弟而相臣趙泰考等潛蓄異謀欲傾李昉遂殺四臣以謀

逆入告幸 聖祖仁皇帝恩准李昉冊封其事始定後趙泰考論

死四臣咸得昭雪而誣逆之辭尙留簡牘懇恩飭查更正下禮部

議尋奏通考所載係據李昉奏報至情之真僞事之反覆遠隔數

千里無由深考卽趙泰考伏誅該國亦曾奏到而於金昌集等被

誣之處並未敘及是其誤由該國聲敘不明並非纂修之譌今既

肫誠籲懇爲祖雪冤實係爲人子孫至道且事經九十餘年該國

臣民並無異言其爲兄終弟及名正言順似無疑義應請刪去此

條以昭傳信從之○壬午調佛住爲禮部右侍郎書銘爲盛京兵

東華續錄

道光四

十

部侍郎○以玉麟爲兵部左侍郎署刑部左侍郎○癸未命設廠煮賑河

南蘭陽等三廳州縣被水災民兩月○甲申以吳榮光爲福建按

察使由鹽道遷○乙酉移吉林釣魚臺伊吉斯渾邊卡駐海清溝三岔

嶺○丁亥 上詣 大高殿祈雪○戊子成格緣事降調以邱樹

棠爲山西巡撫鄧廷楨爲江西布政使陸言爲湖北按察使由山東運

河道○召程贊清來京以常文爲山西按察使由甘肅支肅道遷○庚寅

諭前因成格參奏陳官俊於嘉慶二十四年冬閒在太原縣毆打

辦差家人又於二十五年六月買妾並稱干預公事妄作威福雖

未能實指其苞苴之據而已大開奔競之風等語卽命軍機大臣

等傳到陳官俊詳加詢問所參毆差買妾兩款均已承認至密陳

地方官員賢否則堅稱實未向人洩漏當令軍機大臣寄問成格

向陳官俊鑽營者何人奔競者何人令其明白回奏嗣於十一月

二十四日具摺覆奏前來聲稱魏元煊邱名泰諸人省中紛紛傳說俱經學院保舉此數人官聲素好所舉原不謬妄又稱陳官俊曾向伊說皇上見差太監前往河東查訪商人控告鹽務一案此則更不成話愈辨愈奇支飾尤甚試思此語若確陳官俊當得何罪必應徹底查訊按其是非治以應得之咎特命長齡於經過晉省時馳赴省城著陳官俊前往山西當面質對令長齡秉公查訊孰是孰非據實覆奏茲於十二月十二日長齡奏到據稱到晉後傳旨詢問成格令其一一指證成格惟有伏地叩頭聲稱奏事不實以奇誕無稽之語冒瀆宸聰實屬荒謬不能指實惟求代奏從重治罪已降旨將成格陳官俊均行降革示懲矣陳官俊於嘉慶二十四年冬閒毆差於二十五年六月買妾成格因何不卽行參奏乃一味姑容已屬不能秉公持正及至陳官俊奉有密旨留心

東華續錄

道光四

十一

地方公事成格揣得其情心存畏忌以伺其短又值陳官俊不知檢束於前不能慎密於後高興妄爲自取罪戾但成格於去歲回任至今又將及一載且於嘉慶二十四五兩年終奏報本省學政摺內全未提及一語於此可見毆差買妾之事原不欲行參奏總因陳官俊察訪地方情事恐其遇事直陳有害於己展轉狐疑蓋非一日也又計陳官俊未回京之前若行參奏朕必立派大臣前往查辦是非無難立辨伊焉能售其伎倆是以直待其回京後始行參奏而摺內復隱約其詞使朕存之於心知陳官俊不可信任在內廷之人奉命出差尙且如是其翰詹科道等出差奏事更不足信矣卽使陳官俊有所陳奏朕豈有不辨別是非槩行聽納之理再陳官俊若係朕委任無疑之人何難授以地方大吏或留於山西以備察訪因何學差未滿反令其來京供職耶朕用陳官

俊之意於此可見也詎意成格巧詐欺飾以無可質對之言屢行奏辨是其居心直欲屏朕耳目使不聰明外省之事無敢過問此其咎之重者也至陳官俊奉命典學惟當盡心考試或有與撫臣交涉之事原可公同商酌至奉有密旨後惟當隨時察訪默而識之可奏者奏之不必奏者置之不應將密諭顯露公然議論其賢否是非不特有乖素位而行之誠卽與朕之密諭亦大相逕庭矣躁妄麤鄙深負朕恩必當立予降黜以爲不愼不密者戒朕辦理庶政一秉公誠賢則用之不肖則去之從不心存成見然亦不能直受欺蔽也嗣後各省督撫斷不可因成格參奏學政獲譴卽有不公不法之學政亦不肯據實參奏各省學政亦不可因陳官俊言事不密獲咎明知本省利弊亦皆緘默不言如是則與朕用人行政之心大相刺謬矣故復行申諭各省督撫學政等知之特諭

東華續錄

道光四

七

○癸巳吏部尙書劉鏞之卒命散秩大臣一員帶領侍衛十員往奠茶酒賞銀五百兩治喪予祭葬謚文恭賞其子兵部員外郎喜海郎中華海舉人○調盧蔭溥爲吏部尙書初彭齡爲工部尙書以戴聯奎爲兵部尙書調王以銜爲禮部右侍郎轉陸以莊爲工部左侍郎以顧臬爲工部右侍郎周系英爲內閣學士兼禮部侍郎銜由翰林院侍選○命吏部尙書盧蔭溥不必在軍機處行走○丙申添設河南考城縣巡檢一○庚子免湖北漢陽等三縣節年民欠花利銀○是歲朝鮮越南琉球來貢○會計天下民穀數各省通共大小男婦三萬五千五百五十四萬二百五十八名口各省通共存倉米穀三千五百一十二萬九石一斗六升一合

臣王先謙敬編

臣周潤蕃恭校

道光二年壬午春正月庚戌召富信來京調糜琦瑜爲貴州布政使以羅含章爲河南布政使楊健爲山東按察使

由兩淮鹽運使遷

○王

子諭朕辦理庶務咸遵舊制從前 皇祖高宗純皇帝每次挑選

八旗秀女皆指配與 聖祖仁皇帝派衍近支宗室 皇考仁宗

睿皇帝每次挑選八旗秀女皆指配與 世宗憲皇帝派衍近支

宗室今朕挑選秀女自應遵照此例按代指配與 高宗純皇帝

派衍近支宗室著交欽派之王等嗣後呈進宗室等名單時著將

高宗純皇帝派衍近支宗室名單呈進候朕將挑選之秀女量

爲指配著爲令○諭近來查出旗人抱養民人之子爲嗣者俱已

東華續錄

道光五

另記檔案矣此等子嗣日後皆入民籍伊等之女皆不應與旗人

一併入選著交戶部本年挑選八旗秀女時將八旗滿洲蒙古漢

軍內另記檔案之女俱不必入選著爲令○方受疇以病免以顏

檢爲直隸總督葉世倬爲福建巡撫戴敦元爲山西布政使史譜

爲江西按察使

由浙江鹽運使遷

○以長齡署直隸總督○甲寅截撥上

下兩江漕米六萬石備災缺兵糈○戊午諭阿哥等年至十五歲

著習學騎射每月演習二三次在京城內則於紫光閣在圓明園

則於闕武樓阿哥等演習騎射時著內廷諳達二人輪流隨往年

十六歲習學烏槍每年春秋二季在山高水長一月演習一二次

嗣後阿哥等及皇孫皆照此學習著爲令○諭總管內務府大臣

等嗣後皇子皇孫一經指婚其福晉父家置備粧奩不得以奢華

相尚一槩務從儉約復我滿洲淳樸舊俗將來進呈粧奩清單如

有靡麗浮費之物經朕看出不惟將原物發還並加議處此旨著內務府大臣存記俟經指婚之後卽將此旨交福晉之父家閱看敬謹遵循不得逾制至向來俗例有開箱之禮福晉應進朕與皇后衣服各九套著不必豫備呈進以示黜華崇實之意○申禁各州縣貸民籽種加倍取償○辛酉祈穀於上帝恭奉仁宗睿皇帝配享○壬戌諭錢臻奏州縣交代拖延請嚴定章程一摺向來州縣交代本有一定例限據錢臻查明湖南省州縣交代逾限膠轄甚多皆由各員卸事後不俟交代清楚卽擅自進省接任之員無憑覈算以致展轉遲延幾成銅習自應亟加整頓嗣後該省州縣交代責成該管府州就近督催依限結報如交代未清卽將該員扣留勒限覈算不准擅自回省其例限已逾除咨部照例察議外將該員委署補缺槩行停止儻接任之員才難勒措亦卽據

東華續錄

道光五年

二

實懲辦如府州徧徇玩視查明一併參處先虧帑項責令各半分

賠卽查無虧空亦將督催不力之府州查參以重帑項而杜積弊

○召葉汝芝來京以朱桂楨爲浙江按察使

由陝西潼商道遷

○甲子諭

軍機大臣等葉世倬奏查辦丁歸地糧及民間實在情形一摺山

西省州縣丁徭銀兩歸入地糧攤徵者除已有八十廳州縣外尙

有孟縣等二十一州縣未經議改茲據該護撫查明平定州孟縣

二處情形相同所有孟縣丁徭銀兩著自道光二年起卽攤入地

糧項下徵收其平定州丁銀亦著一律歸併辦理造冊咨部至興

縣等十九州縣情形不一自應次第確查分別覈辦葉世倬見已

簡放福建巡撫如一時不能查辦完竣屆期卽移交新任巡撫邱

樹棠悉心籌畫分別妥議具奏可也○乙丑添設直隸遵化州理

事通判裁州同缺○丙寅諭戶部議駁吉蘭泰鹽斤請由水運一

摺吉蘭泰蒙古鹽斤自嘉慶十七年經大學士等議奏以該處鹽斤行於內地充斥潞網查照舊章止准陸運不准水運內地既無虞滯銷而蒙民亦不至失所至今遵行已久實係兩無窒礙自未便輕議更張所有阿拉善王瑪哈巴拉請仍復水運之處著不准行○戊辰申諭廣東閩浙嚴緝洋盜○己巳命琦善恭修 孔林

○辛未諭三載考績乃國家激揚大典朕仰承 皇考付畀之重兢兢業業與內外諸臣恪遵 成憲共圖郅治茲屆京察之期吏部將京外各大員開單具奏朕詳加披閱酌中覈定雖閒有年老之人察其精力尚不至衰頹有誤職守仍堪留任大學士曹振鏞戶部尚書黃鉞辦理部務本屬妥協又自簡任軍機大臣以來敬共所事實力匡襄禮部尚書文孚在軍機處行走有年小心勤慎克盡厥職大學士伯麟人品端方管理部務甚屬盡心吏部尚書東蔭溥在軍機處行走多年恪恭匪懈前因管理吏部順天府需人特旨調用亦能盡心戶部尚書英和管理部旗內務府事務均臻妥善且於步軍統領衙門尤能不避嫌怨管轄嚴明禮部尚書汪廷珍品學兼優承辦 實錄底本勤慎通達盡心纂輯兩江總督孫玉庭陝甘總督長齡四川總督蔣攸銛均能整理地方察吏安民克副封疆重任江南河道總督黎世序宣力多年一切河務經理得宜永奏安瀾之慶俱著加恩交部議敘吏部侍郎那彥寶屢受 皇考重恩不知潔己報效先後辦理河工聲名甚屬平常著降為頭等侍衛前往吐魯番更換寶興回京不准具摺請訓禮部侍郎善慶夙率無能不勝侍郎之任著回副都統之任行走兵部侍郎吳芳培年力衰邁著以原品休致左都御史顧德慶人屬平庸著以侍郎降補餘著照舊供職特諭○諭御史董國華奏請

嚴汰各部冗員一摺所奏似是而非各部截取外用簡缺知府人員其未經銓選以前仍在本衙門辦事各有本缺職任正可藉資練習若槩令出缺候選是徒與該員以自便之途既非所以造就人才而於部務仍無裨益所奏不可行至京察注入三等八員例得留任以觀後效該堂官原應隨時察看如該員果能奮勉下屆京察尚准列爲上考若如所奏必剋期分別去留休改則三年後察典轉無可汰之員於事理殊覺未協所奏亦無庸議○轉常起爲吏部左侍郎調佛佳爲吏部右侍郎王麟爲禮部左侍郎果齊斯歡爲兵部左侍郎以舒明阿爲工部左侍郎補副部選○調明志爲禮部右侍郎以色克精額爲理藩院右侍郎補土選○以王鼎爲左都御史調陸以莊爲戶部右侍郎以周系英爲工部左侍郎○以顧德慶爲兵部左侍郎○癸酉諭軍機大臣等據朱勳等奏

東華續錄

道光五

四

河北插帳之循化等處九族野番及鹽池一帶空鹽番戶均狡黠背約抗不回巢又蘊依雙勿兩族勾結循貴及四川野番盤踞搶掠等因見已令松筠接署直隸總督著長齡將印務暫交屠之申卽行馳驛回任會同松廷將如何設法驅逐之處相機辦理不可張皇其事亦不可稍涉因循總以熟籌妥計速令遷移朱勳另片所奏添派卡防官兵及每日酌給銀兩之處均照所請行○甲戌諭國家考績鉅典原所以黜陟賢否朕釐工配績一秉大公昨因吏部侍郎那彥寶屢辦河工聲名平常業經降旨降黜因思吳璥當時同往工次列名在前其不知潔已報效聲名亦與那彥寶相等事屬已往姑勿深究若竟以其致仕家居置之不議伊轉得濫邀章服之榮是與那彥寶同罪異罰殊不足以昭示廷臣協符輿論吳璥著革去翎頂以示朕甄覈持平之至意

二月壬午准給廣東駐防文武會試舉人及引見員弁路費○癸未准八旗抱養民人爲子之繙譯舉人生員改作文舉人生員歸入民籍考試○乙酉命奉天暫停海運糧石○申禁民間私藏鳥槍火器○免雲南銅廠民欠工本銀○辛卯諭御史黃中模奏請嚴禁海洋偷漏銀兩一摺所奏是定例廣東洋商與夷人交易止用貨物收買轉買不准用銀立法甚爲周備近因民間喜用洋錢洋商用銀向其收買致與江浙等省茶客交易作價甚高並或用銀收買洋貨實屬違例病民不可不嚴行查禁著廣東督撫暨海關監督派委員弁認真巡查出口洋船不准偷漏銀兩仍不時查察如有縱放之員卽行參革治罪至洋商與外夷句通販賣鴉片煙重爲風俗之害皆由海關利其重稅隱忍不發以致流傳甚廣著該督撫密訪海關監督有無收受黑煙重稅據實奏聞並通飭

東華續錄

道光五年

五

各省關隘一體嚴密查拏如係何處拏獲卽應究明於何處行走所有各關縱放員弁卽參辦示懲如該督撫訪察不力或瞻徇不奏別經發覺立卽加之懲處務期洋船出入積弊革除以清關隘而裕民生○命自道光三年爲始內務府三旗女子內所有回子番子之女著無庸入排引看○壬辰予安徽祁門縣明季殉難舉人馬嘉入祀忠義祠○癸巳兵部尙書戴聯奎卒予祭葬○以王宗誠爲兵部尙書李宗昉爲禮部右侍郎由內閣學士遷○乙未諭先師孔子德配天地道冠古今我朝 列祖 列宗暨我 皇考仁宗睿皇帝親詣釋奠臨雍講學多士圍橋觀聽洵盛典也朕寅紹丕基心誠嚮慕謹於明年仲春上丁親詣辟雍登堂釋奠用昭崇師重道稽古右文至意其應行典禮儀著各該衙門先期敬謹豫備○己亥以敬徵朱士彥徐頰俱爲內閣學士兼禮部侍郎

銜敬徵由侍衛朱士彥候補
內閣學士徐頴由詹事遷

二月丁未 上啓鑾謁 東陵○免經過地方額賦十分之三○

已酉改雲南開化府同知為安平同知割文山縣東安逢春永平
三里俱隸管轄改徽州府司獄為安平司獄移駐開化府麗江府
經歷為文山縣江那縣丞移駐江那里○庚戌 上謁 昭西陵

孝陵 孝東陵 景陵 裕陵詣 端慧皇太子園寢酌酒回

鑾○諭工部承辦 壇 廟工程關繫重大理宜敬謹從事承修

司員法克精額等得受官匠分送成頭銀兩復徇情屬託看冊司
員蒙混銷算該堂官漫不經心以致估辦參差司員朋比受賂又
復毫無覺察吏部分別議以革職降補實屬咎所應得姑念人數
眾多一時簡用乏人著加恩將部議革職之曹振鏞穆克登額盧
蔭溥王以銜陸以莊均改為降四級留任八年無過方准開復部

東華續錄

卷道光五

六

議降二級調用之穆彰阿果齊斯歡均改為降三級留任部議降
一級調用之阿克當阿那清安裕恩均改為降一級留任其分看
銷冊之司員亦著加恩量為末減所有部議降一級調用之工部
員外郎慶祿宜昌主事圖明額關炳曾錫恩均改為降三級留任
此係朕格外施恩該堂司官等當知感奮嗣後務潔己奉公留
心察弊無得再蹈愆尤致干重咎又諭工部堂官失察司員等得
贓冒銷一案其在任較久之員已降旨加恩改為降四級留任但
仍當示以區別曹振鏞盧蔭溥彼時俱在軍機處行走不能常川
到署其餘各員均係專辦部務乃於司員朋比得贓蒙混銷算毫
無覺察其咎較重工部為工程總匯穆克登額年力衰老稽察未
能周密著調補禮部尚書其工部尚書員缺著文學調補陸以莊
著調補兵部右侍郎其戶部右侍郎員缺著湯金釗調補兼管錢

法堂事務引之著轉補吏部左侍郎杜堉著調補吏部右侍郎
○壬子諭旨 臣等阮元奏英吉利國護貨兵船停泊外洋伶
仃山夷人赴山汲水與民人鬪毆互有傷斃飭諭該國大班及該
國兵官交出兇夷彼此互相推諉當將貨船封艙禁止貿易該夷
兵狃於該國被傷後致死無須抵償之例延不交兇旋卽畏罪潛
逃該大班寄信本國奏知國主照例究辦見仍著落交兇並飭諭
辦理等語天朝定例凡鬪毆致死人命無論先後動手均應擬抵
該夷兵在內地犯事應遵內地法律辦理至該國兵船係爲保護
貨船之用該大班承管買賣事務其兵船傷斃民人豈得藉詞延
諉今兵船旣已揚帆駛逸兇夷自必隨往著照所議准令各船開
艙下貨仍飭該大班告知該國王查出兇夷附搭貨船押解來粵
按名交出聽候究辦至該國護貨兵船向止許在外洋停泊買物

東華續錄

道光五

七

取水應由買辦承管旣據該督飭諭告知該國王見在粵洋無盜
以後無庸再派兵船赴粵如貨船必須保護亦應嚴諭領兵官恪
遵內地法度彈壓船內夷兵一切俱由大班管束經理均著照所
議妥辦該督仍當隨時稽察嚴密防範勿致別生事端○癸丑

上還京師○甲寅 上奉 皇太后啓鑾謫 西陵○免經過地

方額賦十分之三○乙卯諭前於嘉慶八年因 裕陵 隆恩殿

年久虧朽查勘拆修係莊親王繇課戴均元蘇楞額專司承辦理
宜倍加慎重揀選堅實木料敬謹成造以期億載鞏固乃甫屆二
十年卽露虧朽情形實係當時辦理不善其原報及查勘各員又
未據實確查具奏當交宗人府吏部嚴加議處茲據分別議奏未
能盡爲允協莊親王繇課承修 陵寢要工始終其事辦理草率
自當予以嚴懲繇課著降爲郡王戴均元於七月間承辦後卽於

是年十二月內前往衡家樓督辦河工尚可量爲未減戴均元著
加恩降四級留任革去經筵講官太子太保無庸管理刑部事務
蘇楞額辦理工程年久 皇考念其尙爲諳習特加委任今乃疏
忽從事以致工料未能經久其咎更重著照議革職卽在工次聽
候差使所有 隆恩殿工程明年擇吉興修仍著繇課戴均元督
同蘇楞額敬謹妥辦以觀後效其嘉慶八年以後重修案內動用
錢糧物件及見搭月臺等項統共計以十成著蘇楞額賠繳五成
繇課賠繳二成戴均元賠繳一成其餘二成著原修之監督司員
無論見在已故按照辦工月日分別賠繳仍查取該司員等職名
交部嚴加議處至原報未經確查之果勒豐阿永康均著照議降
三級調用照例各折罰世職俸半年不准抵銷恩銘彼時係總管
內務府大臣查工是其專責並未據實具奏恩銘著降四級留任

東華續錄

道光五

八

王以銜僅止查勘未能周到著降一級留任○諭軍機大臣等文
幹等奏申嚴邊禁一摺據稱藏屬西南邊缺絨轄爾營官所管之
納溪山洞向有安都喇嘛磋竹讓珠在彼念經修行上年該喇嘛
以廓爾喀地方吉絨噶速塔頂圯擬請募修當經噶勒丹錫呼
圖薩瑪第巴克什寄信阻止該喇嘛仍派徒眾十餘名由聶拉木
出境在陽布雇匠興修廓爾喀亦派彼處喇嘛幫同修理見在塔
頂已修七層工程將次完竣該喇嘛磋竹讓珠明年卽前往開光
等語廓爾喀地方雖經內附究在唐古特邊外該喇嘛擅派徒眾
徑赴陽布捐修吉絨噶速塔工實屬私越邊境既據該大臣等查
明該喇嘛平日修行尙爲安靜因不諳定例致蹈愆尤若遽令中
止頓棄前工恐邊外夷人免心生疑懼著照所議於該喇嘛修
塔事畢後卽將前差徒眾速行撤回並嚴飭該喇嘛磋竹讓珠不

准親往開光嗣後如有欲作善事者須令在內地盡心籌辦無許再行私越境界致干重咎至聶拉木營官於該喇嘛出境時既未嚴行阻止又不隨時稟報殊屬有乖職守見任營官拉爾吉雄巴著卽行斥革以示懲儆其絨轄爾營官於境內居住之喇嘛私行派赴邊外毫無覺察亦屬疏忽所有兼管該營官之後藏戴琿汪金彭楚克著不准其兼管營官事務仍罰俸一年其所出營官缺卽咨行噶勒丹錫呼圖薩瑪第巴克什另選番弁會同驗放以實營額而重邊防該大臣等務嚴飭各邊界營官遵照定例一體嚴密稽查不准番夷僞俗擅自出入致滋弊端如有私越邊界者卽行從重懲辦○命改繞斗峪爲寶華峪○戊午 上謁 泰陵

泰東陵 昌陵○臨奠慧安和碩公主慧愍固倫公主園寢○己

未清明節 上謁 昌陵行敷土禮回鑾○壬戌 上詣 孝穆

東華續錄

道光五

九

皇后殯宮前酌酒○臨奠莊靜和碩公主莊敬固倫公主園寢○奉 皇太后還京師○丁卯封浙江鄞縣宋翰林院侍讀晁說之神爲孚惠侯○庚午諭軍機大臣等長齡等奏籌辦驅逐番帳調派官兵並酌給鹽糧馱折等項各等語野番背約遷延名爲貪戀水草實圖便於搶掠必當示以兵威嚴加懲創旣據該督等調派督標及附近各提鎮屬官兵八千餘名緊顧東西北三面分途併進並咨會蔣攸銛於路通蜀藏處所豫爲防範均著照所議辦理該督等惟當相機審度籌及萬全如該野番等知難逃遁迅速遷移河南著卽停止前調官兵以節糜費如敢恃眾抗拒卽當督率官兵痛剿俾番族咸知儆惕邊圉悉臻靜謐至所調官兵需給口糧柴薪及經過州縣應付騎載車馬該督按照各營道里遠近酌定齊集日期自離營之日起照出征例支領鹽糧馱折等項按

程行走亦著照所議行○辛未命江西推廣社會成法准民間質押穀石○壬申以辛從益爲內閣學士兼禮部侍郎銜由太常寺卿遷○添設河南考城營遊擊守備各一

閏三月己卯申諭各省偶被災迅速勘辦○庚辰諭從前盛京吉林捕得虎熊豹俱經進獻惟虎因南苑內演習技藝往往需用熊豹並無用處將此字寄盛京吉林將軍等二十七箇月後該處如捕得虎子仍令照常齎送熊豹著無庸進獻○辛巳命奉天仍運高粱粟米接濟山東登州等府民食○壬午申禁福建廣東械鬪積弊○癸未諭順天武鄉試大典乾隆年間定於十月初五日開弓十一日出榜至嘉慶九年始改爲十月初七日開弓十二日出榜因思校藝時日自應稍從寬裕嗣後順天鄉試外場著仍照舊例於十月初五日開弓十一日出榜著爲例○乙酉諭孫玉庭

東華續錄

道光五

十

等奏覆查江蘇省攤捐各款確數籌議一摺前據戶部覈議該省攤捐成數過多州縣辦公不能寬裕未便議准當經降旨令孫玉庭等再加確覈如可酌減及以閒款調劑之處另行熟籌妥議茲據該督等奏稱常年攤捐各款江淮等屬計算不及二成蘇松等屬計算亦止二成有餘仍可照舊捐辦其蘇州等屬遇事派捐各款較江淮等屬爲數稍多請於司庫籌撥銀兩生息係爲調劑起見著照所請卽於江蘇藩庫耗羨等項下撥銀十萬兩發典生息每年共得息銀一萬二千兩是遇事攤捐之款已酌減十分之四各屬州縣儘可從容辦公此後如仍有不知檢約藉口虧那者該督等卽隨時據實參辦儻有徇隱別經發覺惟該督撫是問○申諭京城內外嚴緝劫案○穆克登布以年老免以禮恩爲理藩院尙書由戶部左遷○丙戌調果齊斯歡爲戶部左侍郎以常福爲兵

部左侍郎

由副都統遷

○辛卯以服闋巡撫會煥爲兩淮鹽政仍用二

品頂帶○予明臣劉宗周從祀

文廟○癸巳諭文幹等奏後藏

糧員向派佐雜微員管理多有侵虧情弊請與前藏及各臺糧員

一律派委州縣丞倅等語著照所請後藏糧員員缺該督卽於州

縣丞倅內速行揀派飭赴後藏接管糧務嗣後均著照此揀派○

甲午 上臨故慶僖親王永璘殯所賜奠○乙未諭軍機大臣等

據刑部奏械鬪之案起於閩省漳泉二屬而粵東惠潮爲尤甚近

來江西湖南浙江廣西各省亦間有致斃多命情近械鬪之案本

年閏三月初旬廣東省咨到人命案內有潮州府屬賄買頂兇旋

卽破案將頂兇之人依例擬徒另緝正兇者共三十七件大半皆

火器竹銃殺人而起釁多因口角細故見在報部頂兇之案數日

之間至三十七件之多若非串屬賄買何肯輕生頂兇若無主謀

東華續錄

道光五

二

斂錢買兇之人又何以械鬪致斃多命之案輒甘心頂認見雖審

明頂兇而各案原謀糾鬪之犯並未究出定例主謀首禍罪名實

浮於下手斃命之人總應嚴辦主謀稍寬從犯請飭各該督撫查

明械鬪情形妥議章程等語械鬪逞兇糾殺多命最爲風俗人心

之害而地方官規避處分往往分作尋常命案辦理不究首禍之

犯致兇徒無所儆畏著廣東福建廣西江西湖南浙江各督撫查

明近年械鬪情形應如何申明禁令將斂錢聚眾之人飭地方官

留心訪察嚴拏懲辦不至再釀巨案如有糾眾致斃多命之案其

首禍原謀應如何按糾眾人數致死命數分別加重治罪及執持

火器刀械下手之犯應否分別稍予從寬詳細妥議章程具奏○

庚子賜戴蘭芬等二百二十二人進士及第出身有差○諭前據

直隸藩司屠之申奏直隸差務殷繁議請於每地一畝攤徵差銀

一分以均徭役當經降旨批示俟顏檢到任後安議奏聞再降諭旨茲據顏檢查明據實覆奏該藩司減差均徭之說實不可行所論極是賦役之制東南則賦重役輕西北則賦輕役重立法至爲深厚若如該藩司所奏是役重而賦並重其意何居嗣後直隸辦理差役著顏檢嚴飭該管道府仍遵舊章各就地方情形斟酌妥辦該督仍隨時查察該州縣如有能體恤民艱公平允協之員據實保舉其有聽信書役任意浮派苛累者指名糾參治罪若有劣衿藉端包攬刁民申通妄控者立即審明按律嚴懲則吏治自肅而民生可期日裕矣至屠之申未能體察情形冒昧陳奏意在藉賦以收減差之實效不知適藉差而添加賦之虛名累官病民其弊不可勝言屠之申著交部嚴加議處尋議革職得旨著加恩降爲知府留於直隸候補交顏檢差遣委用○癸卯調鄭裕國爲直隸布政使程國仁爲江甯布政使以陳中孚爲廣東布政使黃鳴傑爲廣東按察使

由直隸補用道遷

○是月蠲緩奉天甯遠等三州廳額

賦

夏四月己酉諭近來京外各官遇有遷擢皆於召見及接奉批摺後始換升銜頂帶本非舊制嗣後京外升任人員京官自奉有諭旨外官自接到部文後著卽換用升銜頂帶○庚戌長齡等奏剛咱等族番賊向西南逃竄官兵馳赴托里地方截擊獲勝○癸丑允戶部議京倉米石以放代盤○甲寅諭英和等奏米石例禁請循照舊章等語嗣後著仍照舊例細米一石以內實係鄉民買食者准其出城其麤米顆粒不准出城城外之米無論麤細槩不准其出境城內責成城門領催城外責成各營汛員弁等分別實力巡查如有得錢賣放失察偷漏卽行據實究辦如管門官兵將鄉

東華續錄

道光五

十一

民買食細米索詐阻拏照例治罪至米店確坊如有違例囤積至五百石以上者查明照例嚴辦以除積弊○丁巳添設四川重慶鎮中營千總一駐淨圖關○辛酉長齡等奏進剿番賊連獲勝仗賞賚有差○辛未尊藏加上 孝敬憲皇后 孝聖憲皇后 高宗純皇帝 孝賢純皇后 孝儀純皇后 尊諡冊寶於 太廟盛京 太廟並尊藏 仁宗睿皇帝 孝淑睿皇后 冊寶於盛京 太廟○諭軍機大臣等長齡等奏官兵殲斃番目餘賊窮蹙散竄見仍趕緊接捕一摺各路鎮將帶兵追剿野番併力攻擊或夜襲賊營或用礮轟擊連獲勝仗殲擒番賊數百人奪獲牛羊萬餘隻餘賊俱向雪山一帶逃匿長齡等慮及餘賊西竄飭令副將丁永安等緊顧西北知會提督齊慎移師南來該提督探有番賊藏匿連夜帶兵進發該匪等恃險抗拒卽分布將弁親督官兵直

東華續錄

道光五

七

衝山梁復殲斃番賊二百數十人奪獲牛馬羊隻五千三百有奇生擒噶布古等十六名訊據供出剛咱族大頭目乙旦木已被官兵殲斃見將割取首級及所穿棉甲合喇嘛蒙古等辨認屬實所辦甚好覽奏實深嘉慰提督齊慎著賞給松石壽字翎管一箇白玉搬指一箇大荷包一對小荷包四箇以示嘉獎外發去瑛瑯翎管五箇洋鎗五箇煙壺五箇文竹搬指套五箇玉柄回子小刀五把著長齡等分賞出力官弁所有帶傷官弁四員兵九名陣亡兵三名著卽咨部照例卹賞見在擊散番賊俱向雪山一帶竄匿該處寒瘴最甚斷難久延該督等當督率官兵趁此天時暖熱趕將零星搜捕淨盡迅速肅事用副委任

五月丙子諭徐錕奏西安駐防八旗各佐領下生員及已冠童生必須設立書院以資教導請於馬廠地租項下餘賸銀兩並存庫

馬價銀內暫行借撥發商生息以爲延師修脯及月課獎賞之用等語滿洲風俗以清語騎射爲重其有志讀書勤學上進者原可自得師資豈盡在官爲訓課始能獲益且近來各省書院日就廢弛均係有名無實朕所深知該將軍奏請撥款設立書院行之日久必致仍屬具文於造就人才終無裨益所奏著不准行○己卯諭內外臣工陳奏事件原不應有副封關會該管衙門自嘉慶四年欽奉 聖諭飭禁之後各省督撫提鎮等俱各懍遵將另咨軍機處副封奏底悉行禁革乃理藩院衙門向有新疆西北兩路將軍都統大臣及駐藏大臣等將奏事摺底另用副封關會者至今尙未裁革殊屬非是著再通行曉諭該將軍都統大臣等嗣後陳奏之事除審案供招應咨該衙門查覈外槩不准以副封摺底仍前關會黨不祇遵理藩院堂官卽據實參奏將關會之員交部議

東華續錄

道光五

十四

處若理藩院堂官不行參奏將來別經查出定將該堂官一併懲處不貸○諭各省借項修築民堰官爲經理者三年內如遇衝決照官隄例賠修○壬午諭長齡等奏勦捕番賊已就肅清一摺青海口外野番抗不回巢經該督等率領官兵奮力追勦屢獲勝仗該野番分竄雪山山長齡督飭鎮將不避艱險入山搜捕盡數殲除迅速戴功甚爲可嘉覽奏欣慰允宜渥沛恩施長齡著加恩賞帶雙眼花翎交部從優議敘並親書御製詩扇一柄賞賜用昭優眷○毓岱以病免以阿霖爲江西巡撫成格爲浙江布政使前任山西巡撫○甲申莫晉以議奏倉場盤查事宜負氣爭論降內閣學士調張映漢爲倉場侍郎補○乙酉宣示硃批倉場侍郎莫晉奏摺莫晉奏查倉簡易之法懲弊於事後不若杜弊於幾先以意用法則權變無方批以智術馭下朕不爲也又奏執法防姦則稽查有盡

批辦理庶政不執法將何所執耶又奏近日以放代盤之議部臣以爲良法美意而臣顧斥爲下策拙謀誠以善處事者當行所無事不可轉增無事之擾也太倉陳因之積原非可銖銖而計石石而量批汝之忽遲忽速或略或詳方是無事之擾也此與盤其多少不符者若干廠實虧若干石非自相矛盾乎又奏向例每年欵派查倉大臣查倉御史何嘗不隨時點驗覈實鉤稽原不過得其大槩情形決不能周知底裏非特他人無由信其必無虧短卽以臣之久任倉場亦烏能保其有虧與無虧哉批不因久任亦不如此回護可恨又奏如戶部新例則處處窒礙勢必公私交病咎戾橫生批又不能指出所以然者恫疑虛喝將誰欺耶又奏徒使各倉場胥役巧借彌補之名陰肆剋扣之術批朕恐無暇及此又奏恃有新陳搭放之例暗操高下其手之權批平素能保其不如此

東華續錄

道光五

十五

乎又奏但盤查固非可常行尤未可全廢批汝自有良策又奏法有限而弊無窮決非一定之章程所能箝制批一切章程例制全係無用之舉惟一詐字是汝之護身符也又奏莫若先聲後實以勢驅之批又是一派智術又奏昨奉旨交大學士軍機大臣會同九卿覈議自必另有長策復何待臣言顧念耕當問奴織當問婢臣久司倉務不敢不效其一得之愚批好比擬可發一大笑此時尙早日後恐不免有問汝之處矣又奏懇於羣臣議上時明降諭旨大意謂天庾正供理宜慎重必當隨時查覈以杜弊虧但部議以放代盤與嘉慶年間名同實異紛紛改變前章殊非善策姑暫行停止俟秋間漕竣後另行降旨徹底清查如此則各倉官吏知不久終必盤查又恐來歲舉行終不敢放膽作弊批導朕以詐更可

惡矣又奏嗣後或風聞何倉虧短又或不待風聞特旨專盤一倉
欽派大臣查驗按照實貯清冊逐處子細覈對止盤其多少不符
者若干處實虧若干石嚴行究辦便可懲一儆百時時作欲盤查
之形及至盤查卻甚簡捷虛聲實法相附而行批一片狂言巧掉
蘇張之舌又奏或一歲一盤或閒歲再盤又或三四年或五六年
一盤其期忽遲忽速其法或略或詳使人不能測度批教朕如此
存心如此辦事朕雖不明亦不至如此庸闇受此愚弄貽笑於將
來也又奏或可使太倉實貯久遠無虧批必如此多方詭譎止落
得一箇或字可謂謀國之忠臣矣又批爾大臣等閱此必謂朕勃
然矣不然朕自幼承受 教訓鞠育之恩擇師誨導涵養有年雖

不敢自信恢宏亦不至麤厲褊狹事愈大心愈小情愈急急愈和
此朕自勵之常規也卽如莫晉任性狂言斷不能受其欺罔亦不

東華續錄

道光五

六

肯治以重罪惟恐因一人一事有誤將來故特將莫晉此奏及朕
之批駁原委宣示諸卿知之○丁亥以廉善爲熱河都統調玉麟

爲刑部左侍郎轉明志爲禮部左侍郎調齡椿爲禮部右侍郎以

齊布森爲盛京工部侍郎

由左副都御史選

○辛卯吏部右侍郎佛佳以

疾免○丁酉以多福爲左副都御史

由古城領

○戊戌諭文學等

奏研訊承審命案各員乖謬顛倒並已革知縣會經得贓大槩情

形一摺所奏訊出各情與朕訪聞無異可見細心推鞠秉公持正

可嘉之至陝西巡撫朱勳歷任有年於地方人命重案任聽屬員

顛倒是非舞弊枉法其咎甚重鄧廷楨前在西安府任內承審此

案堅執己見並不悉心推究且與該縣徐潤信函有將就完結無

庸開檢之語看此行爲竟是昏庸無識之人且恐別有情弊豈復

能勝藩司之任朱勳鄧廷楨俱已降旨解任交文學等傳案質訊

矣鄧廷楨已諭令阿霖派員押解赴陝文孚等如訊出鄧廷楨有賄託別情著據實嚴參卽審辦此案之督撫司道如有飢法情弊亦應嚴懲辦理此案於吏治民風大有關繫文孚等務須徹底嚴究伸直屈枉誅墨傲貪以端風俗而正人心斷不可稍存將就之見使該劣員等得以倖免罪戾也○解朱勳任以程祖洛爲陝西巡撫陸言爲山東布政使由湖北按察使遷○解鄧廷楨任以誠端爲江西布政使調常文爲陝西按察使由山西調○己亥諭軍機大臣等長齡等奏番賊悉數殲除青海全就肅清一摺長齡等此次勦辦野番甫經兩月將蘊依等二十三族野番抗拒者盡數馘俘不留遺孽偏脅者咸從寬貫押回原處恩威並用國法丕彰見在黃河以北全境肅清蒙古邊氓悉皆安堵辦理妥善可嘉覽奏深爲欣慰前已降旨令長齡等曉諭蒙古王公等勉思振勵自相保衛此時

東華續錄

道光五

十七

須將善後事宜籌畫周妥該督等當計及久遠詳慎定議俾邊圉永臻安謐方爲不負委任○定提督以下失察 陵寢禁地盜樹

處分○調常德爲山西按察使以盧元偉爲直隸按察使由廣東鹽運使

遷○調黃鳴傑爲湖北按察使以李湮爲廣東按察使由糧道遷○辛

丑河南漳河決○壬寅停止巡漕御史○召廉敬來京調玉輅爲

江蘇布政使誠端爲雲南布政使以潘恭辰爲江西布政使由廣西按察使

遷○是月展緩河南睢州等十五廳州縣通賦蠲緩河南睢州

等十六州廳縣沙壓隄占水占地賦直隸滄州等五州縣並嚴鎮

海豐二場被水賦課緩徵陝西岐山縣山東郟城等六縣衛被災

新舊額賦

六月癸卯朔諭定親王蘇恩端謹持躬賢能著續自幼仰蒙 皇

祖高宗純皇帝恩眷迨我 皇考仁宗睿皇帝親政以來疊蒙

簡畀管理旗營及各衙門事務授爲御前大臣俱能盡心職守力
矢公勤不意自上年遺疾時發時愈尙能勉趨公及本年春間
疾作較前加劇朕每派人存問遣醫診治並派惇親王代朕看視
猶冀剋日就痊用資倚任茲聞溘逝實深震悼著賞給陀羅經被
派大阿哥卽日帶領侍衛十員代朕前往賜奠並著惇親王瑞親
王同往奠醴加恩於例賞外由廣儲司庫加賞銀五千兩經理喪
事朕再示期親臨賜奠以示優卹所有任內處分悉予開復其餘
飾終典禮著各該衙門察例具奏尋賜祭葬諡曰恭○以京控日
多飭拏訟棍○以費丙章爲廣西按察使擢江蘇淮○乙巳移宛
平縣丞駐門頭村○丁未 上臨故定親王縣恩第賜奠○諭定
親王縣恩孝友性成忠勤懋著自少至老疊蒙 列聖隆眷益謹
慎自持數十年如一日本日朕親臨賜奠悲惋實深特頒御製詩

東華續錄

道光五

六

章並仰體我 皇祖高宗純皇帝暨我 皇考仁宗睿皇帝眷顧
恩意用廣錫類之仁益篤懿親之典其子貝勒奕紹於百日孝滿
後仍著派襲親王該衙門不必帶領引見所有應行事宜著該衙
門察例具奏並派滿洲軍機章京將本日諭旨及御製賜奠詩齋
交奕紹載銓於王靈幃前焚化至殯送之前一日朕仍親往賜奠
以示眷念宗親有加無已之至意○諭各省請旨簡放之缺不准
以在省候補人員奏請○壬子定漢軍親老人員改近終養例○
癸丑諭伯麟年逾七旬素患骸疾前在雲貴總督任內以協辦大
學士來京供職朕御極以來特加簡任授爲大學士仍令管理部
旗事務固其步履艱難格外體恤一切引見差使有時免其帶領
此朕恩體耆臣之心在廷諸臣共知共見伯麟身爲宰輔自當循
分盡職本日召見議及旬到事宜據奏將來旬到尙可調養半月

勉爲趨事至明日御門典禮卽不能進跪御前因免冠叩首據稱若於外任差使不過坐辦尙能報效等語冒昧已極伯麟如果自揣精力就衰卽當引疾求退乃旣不辭免轉生出位之思試問以大學士出就外任非畀以封圻不可伊止知總督之養尊處優而不知任大責重以伊衰暮之年使加以簡任尙安望其稱職無忝乎人臣進禮退義原不應竊祿希榮伯麟竟欲以要君之舉堅其戀棧之心膽大荒謬莫此爲甚若仍再事姑容何以飭朝綱而服寮案伯麟著以原品休致念其清文諳熟仍著充 實錄館總裁

並賞給半俸俾得敬專其事以示格外施恩○甲寅賞故漕運總督桂芳子炳奎六部主事○戊午諭據吏部議奏史致光等請將經歷姜元吉題升保山縣知縣查明該省見有候補知縣該督等率將佐雜人員題升實屬違例所有保山縣知縣一缺著照吏部

東華續錄

道光五

九

所議以高坐補授其違例保題之該督撫著交吏部察議嗣後各省無論題應調及應選缺出該督撫俱當按照一月具題定限不准故爲延閣其或遴員未定不能如限具題須將後出之缺先行題補著卽隨本聲敘緣由以憑查覈如有無故延閣陵躐請補者著該部查明嚴參以杜蒙混擇缺之弊將此通諭各直省督撫知之○己未諭禧恩等奏理藩院議覆烏里雅蘇台將軍特依順保具奏烏梁海地方驅逐潛住之哈薩克及科布多商人私向杜爾伯特交易一摺松筠於奉旨交議後曾向禧恩言及俟定議後將摺彙先行送看並向該司司員告知理藩院定彙後卽行送來並交圖樣一紙該司司中珠拉於畫彙後卽交員外郎定泰向松筠繳回原圖松筠向其索彙閱看將彙刪改等語六卿分職各有專司若將別衙門所辦之事妄加刪改實爲罕見罕聞卽和坤當

日之專權橫恣亦未敢公然出此松筠係屢次獲咎之人朕御極以來特加錄用外而都統內而尙書並簡任軍機大臣加恩實不爲不厚伊應如何力改前愆免圖報稱乃越俎專擅至於此極實屬膽大妄爲設軍機大臣於各部院應辦之事皆得越分干預尙復成何政體此而不嚴加懲辦何以示戒於將來松筠著大學士軍機大臣會同九卿議罪禱恩於松筠向其言及議奏之事屬令給稟閱看並不及早參奏又失察司員將奏稟擅交刪改禱恩博啓圖色克精額俱著交部議處理藩院郎中珠拉於該堂官判畫奏稟後不卽持回署內輒交員外郎定泰送松筠閱看厥咎惟均珠拉定泰俱著交部嚴加議處○諭長齡等奏青海地方全就肅清移住蒙番防守一摺循化貴德野番前此盤踞助勒蓋克克烏蘇一帶原係蒙古貝勒特里巴勒珠爾等六旗游牧地方見今人

東華續錄

道光五

二十

兵將野番勦除淨盡該督等諭令該貝勒等各歸原牧僉以移居青海已久人少勢孤不願復業該游牧地方寬闊若強令遷回勢不能防守籬籬著照所議助勒蓋一帶卽令察罕諾們汗移居克烏蘇一帶飭回阿里克大百戶住牧均各給予執照俾垂久遠每歲河冰結後責令分段防河並於冬春兩季賞給該諾們汗及阿里克大百戶置備口糧銀各一千兩用示體恤見在阿里克大百戶歡布他拉已故其子喇沁納木扎爾尙未承襲係歡布他拉之弟乙達木代管其事乙達木著賞給六品頂帶及身而止俟喇沁納木扎爾襲職後仍責成佐理以資防守其向年會哨之兵卽行停止至察罕諾們汗失察屬下句結野番屢次搶掠本有應得之咎姑念此次隨營出力又將該旗賊犯查拏送究著加恩免議

○命海齡專辦副都統事以明山爲刑部右侍郎調嵩孚爲貴州

巡撫以羅含章爲廣東巡撫調陳中孚爲河南布政使以蘇明阿爲廣東布政使訥爾經額爲湖南按察使

由山東兗沂曹濟道遷

○山東衛

河溢○壬戌諭昨因禧恩等參奏松筠刪改理藩院奏稟降旨交

大學士軍機大臣會同九卿議罪茲據大學士曹振鏞等會議具奏松筠以吏部尚書在軍機大臣上行走如果於邊疆事宜確有所見自應於召見時據實面奏或恐不能詳盡亦可另摺敷陳卽理藩院所議果有未協松筠何難於該衙門具奏後專摺奏駁乃輒將該堂官定議摺稟任意刪改實爲從來未有之事大學士等議以革職發往新疆效力贖罪本屬咎所應得但松筠年逾七旬遠赴戍所亦難望辦公出力念其清文尙爲諳熟松筠著加恩以六部員外郎候補在上書房繙繹諳達上行走以示朕格外施恩至意○予故直隸總督方受疇祭葬○甲子申禁直省各衙門額

東華續錄

道光五

三

外增置書役○丁卯諭軍機大臣等據孫玉庭奏接兩淮鹽政會煥鈔寄覆奏御史條陳鹽務事宜摺稟內有輪規當散一條會煥意在整輪該督以兩次接陳若霖來信楚省自上年散輪後商人極見相安並無跌價搶賣之事若散售未久仍復整輪水販必致觀望民間將虞淡食並據運司錢寶甫前在湖北鹽道任內稟稱未經封輪以前及封輪以後商運暢旺消乏情形指陳最爲明白請交湖廣督臣確查實在岸情隨時制宜再行定議施行等語此事前據會煥奏稱封輪章程行之年久商販相安自散輪之後爭先搶售跌價水販乘機壓勒於國課民食均無裨益請照舊封輪銷售輪規之整散關乎銷引之暢滯而疏引裕課以漢岸爲重督銷專責尤在楚省熟籌辦理著陳若霖詳查楚岸見在情形是否必須散輪抑或照舊封輪之處悉心妥議具奏務期鹽引暢消商

本無虞虧折小商不致守候方爲至善不可稍有回護○定誣竊致死治罪例○添設江南徐州府峰山河埵千總一協防效用各二天然關河埵把總一協防效用各二○戊辰命長齡爲文華殿大學士兼管理藩院事以戶部尙書英和協辦大學士調文孚爲吏部尙書禱恩爲工部尙書以那清安爲兵部尙書玉麟爲左都御史轉明山爲刑部左侍郎以恩銘爲刑部右侍郎調裕恩爲吏部右侍郎齡椿爲工部右侍郎博啓圖爲禮部右侍郎以海齡爲理藩院侍郎由副都統遷○己巳以富俊爲理藩院尙書由吉林將軍遷○移江西贛州府通判駐大湖江○是月賑山西興縣水災緩徵江蘇海州宿遷縣雹災額賦並邳州等六州縣借修民堰銀

臣王先謙敬編

臣周倫蕃恭校

秋七月乙亥定淮商辦公銀數革除加帶銀兩場壩黑費趕納豫
納及商人首總名目○丙子 上再臨故定親王絳恩第賜奠○
丁丑命琦善治衛河姚祖同治漳河○甲申諭軍機大臣等呢瑪
善等奏遵旨調集官兵籌辦果洛克番賊一摺果洛克番賊搶劫
西藏堪布前經查獲原贓係達回等寨所為自應就案辦理大加
懲創見據該將軍等查明該處道路可以通行札調漢土官兵前
往查辦著桂涵飭令德印先行馳赴該處傳喚索朗丹巴密諭安
分之各番寨毋使驚惶並密探達回等寨番賊蹤迹嚴行圍捕桂
涵仍帶兵在相距三十里地方暫為駐紮如該番賊震懾兵威將

東華續錄

道光六

此案正賊悉行縛獻卽就地訊明懲辦取結完案儻負嘯觀望著
卽統率官兵設法勦捕分路揆拏務期悉數捕誅肅清邊境○姚
祖同緣事解任調程祖洛為河南巡撫以程國仁為陝西巡撫戴
三錫為江甯布政使魏元烺為四川按察使由雲南池南道遷○以王鼎
暫署河南巡撫由左都御史署○予告大學士三等襄勇侯明亮卒命鄭
親王烏爾恭阿賜奠賞銀一千五百兩治喪賜祭葬諡文襄入祀
賢良祠○乙酉命嗣後見任官員不准加捐職銜著為例○丙戌
諭繇課等奏恭建萬年吉地工程一摺本日特召戴均元英和同
軍機大臣入見面諭我朝自開創以來敦尚淳樸 列祖 列宗
黜華崇實 貽謀宏遠奕禩昭垂朕紹登大寶恪遵 成憲特派
大學士戴均元等於 東陵界內選擇寶華峪為萬年吉地復派
繇課戴均元英和等敬謹辦理節經諭令一切工程務使樸實並

諭以寶城內月臺碑亭等工程酌量裁減地宮內之起脊琉璃黃
甄頭停金券內之經文佛像及二柱門俱行裁撤其石像生一項
量爲收小井上石欄無庸起建亭座茲據縣課等奏稱應裁減者
俱行裁減大殿舉架落矮之處俟採辦木料時再行覈減寶城頭
停方城紅牆臺基各尺寸均經酌定俱著照所議辦理國家定制
登極後選建萬年吉地總以地臻全美爲重不在宮殿壯麗以侈
觀瞻朕於嘉慶二十三年隨侍 皇考仁宗睿皇帝巡幸盛京恭
謁 祖陵瞻仰 橋山規制實可爲萬世法守朕敬紹 先型謹

遵 前制固不敢稍涉奢靡失朕初心亦不敢過從簡陋有所難
言但恐將來踵事增華有加無已是以節經降旨槩從樽節俾世
世子孫仰體此意有減無增永守淳樸家風從此累次遞減相傳
勿替實爲我皇清萬世無疆之福也所有地宮應用錢糧數目著

東華續錄

道光六年

二

工部先行估計交承修各員覈實辦理此旨著另錄一通交上書
房存記○辛卯諭戶部奏各直省收捐監生歸補封貯銀兩請令
覈實歸補足額並請將已補足額省分停止外捐監生一摺各直
省外捐監生原爲歸補封貯嗣經戶部議奏以收足十萬兩解部
以續收五萬兩歸還封貯相閒輪轉迄今已閱二十餘年之久據
戶部查明統計收捐監生銀數除因軍需動用及歷年解部並見
存司庫外實歸還封貯銀三百七十三萬五千六百餘兩尙未歸
還三百六十一萬三千九百餘兩此內惟浙江江西湖南江蘇廣
東五省已歸補足額其餘各省尙未補足著該督撫將此項捐銀
應解部者卽行解部應歸補者卽行歸補不得因有需支撥輒請
暫留應用以期覈實歸款所有已補足額之浙江等五省外捐監
生卽行停止其歸足後續收銀兩儘數解部嗣後尙省歸補完竣

卽隨時奏明停止自此次歸補足額之後不准擅行動墊如有急需奏明動用卽行籌歸原款儻經理不善任意提支那墊一經查出惟該督撫藩司是問以重庫貯而垂經久○乙未 上臨故大

學士襄勇侯明亮第賜奠○諭廉善奏伊母患病時發時愈口外並無良醫恐日久氣體漸頹致伊誤公請開缺侍親回京就醫等語廉善著加恩准其開缺回京俟伊母病痊之日另行賞給差使此係朕以孝治天下之意念其母病格外施恩爲臣子者斷不可因有此旨輒以私情率請致啓規避捏飾之漸○丙申命恭修

仁宗睿皇帝本紀○我閩洋緝捕米艇○賑直隸霸州等二十一州縣水災

八月癸卯河南新蔡教匪朱麻子滋事命程祖洛捕治之○封故

浙江嚴州府知府王光鼎爲昭應伯○丁未諭陳若霖覆奏查明

東華續錄

道光六

三

楚岸散輪後銷鹽暢旺情形請無須照舊封輪又據曾煥奏上年散輪後商船搶售水販挑剔眾商觀望陳明議整輪規實情各一摺此事前據孫玉庭因曾煥有輪規宜整之議將楚省上年散輪後商販踴躍情形具奏當交陳若霖詳查妥議茲據奏自上年散輪之後各路商販雲集向來官引未能流通之處客販亦源源而至一年之內比較封輪之年共溢銷鹽二十六萬四千餘引行銷實爲暢旺商船水販並無搶售跌價乘機壓勒等事湖南湖北兩省各州縣民間食鹽價值較減若復整輪挨售在水販稽留觀望不能源源買運而大商把持壟斷擡價加耗民有食貴之虞私梟卽得以充斥仍請散輪銷售而曾煥復請整輪以培商力輪規之整散原爲恤商以便民若專顧商情有礙民食其流弊豈可勝言旣據陳若霖查明散輪後商民兩便並無搶售壓勒之事著照所

議仍行開輪銷售如實有商情未協之處俟試行一二年後再將實在情形奏明辦理該督等不得因定議在前稍存回護遷就之見以致累商誤運○諭那彥成等奏審明渭南縣民柳全壁毆斃人命承審各員辦理乖謬分別定擬一摺此案已革渭南縣知縣徐潤於承審時受人屬託就案詳結以致疏脫正兇事後復得受酬謝贓銀實屬故出人罪著枷號兩箇月滿日發往伊犁充當苦差以示懲儆已革候補知縣姚洽雖無聽受賄屬情事惟率將屍親疊次掌責殊屬躁妄著加等問擬杖徒解任江西藩司鄧廷楨前在西安府知府任內於所屬命案不能悉心審辦並恐屍遭蒸刷拘泥例文堅不開檢偏執枉縱但訊無貪酷重情著卽行革職加恩免其發往軍臺前任陝西巡撫朱勳於屬員勒取悔結審斷乖謬漫無覺察咎實難辭前經部議革職姑念其尙無徇縱別情

東華續錄

道光六

四

著加恩以四五品京堂來京候補長齡審辦此案據實平反惟未能審出徐潤事後得贓實情著交部察議○廣東巡撫羅含章奏請復姓程氏允之○召史致光來京以明山爲雲貴總督由刑部左侍郎

遷

○戊申召慶保來京以趙慎畛爲閩浙總督盧坤爲廣西巡撫

朱桂楨爲甘肅布政使調吳榮光爲浙江按察使以蘇成額爲福

建按察使

由江西擢道遷

○己酉調陸以莊爲刑部右侍郎以朱士彥爲

兵部右侍郎

由內閣學士遷

○新蔡逆首朱麻子就擒○庚戌諭朕恭閱

皇考仁宗睿皇帝實錄內載嘉慶十六年六月奉 聖諭部院

捐納各員俱係籤分學習行走既云學習則必有優劣之殊該堂

官於行走年滿時自當詳加甄別乃近來各該堂官於捐納報滿

人員無不保留一味市恩邀譽止圖見好於人不顧登進之濫不

辨賢否之別近來大員俱中此病朕實寒心等因欽此仰見 皇

考激敘官方隨時訓飭至意朕思各部院行走司員不獨捐納一項卽正途出身人員籤分學習於行走年滿時亦照例由該堂官察看分別奏留此等人員奏留後卽可循資得缺以次洊升迨其俸滿截取便膺外任若於奏留時不嚴行甄別則庸劣闖茸之員均得濫竽充數一經外任必致貽誤地方不可不慎之於始嗣後各部院堂官於所屬學習行走年滿司員無論捐納正途務當破除積習秉公和衷據實甄別毋得瞻徇情面濫行奏留如有任意姑容不加察覈將來該員得膺外任於引見召對時經朕看出或別經訪聞查有劣蹟惟該堂官是問○諭軍機大臣等那清安等奏兵部當月司員付送新疆文移等項於巴里坤黃布口袋內拆出匿名揭帖一紙並未黏封謹將原帖呈覽一摺據揭帖內稱陝甘總督長齡等查辦青海番賊一案甫經凱撤官兵旋有賊番復

東華續錄

道光六

五

出約有二千餘人分作四股肆行劫掠該管大臣並不派兵堵剿等語青海番賊滋事前派令長齡齊慎前往查辦旋據奏報帶兵剿除黃河以北全就肅清並移住富強蒙古番子以資防守籌議善後章程八條俱照所請行在案茲復有字識匿名揭帖其所稱賊番肆掠情形有滋擾月日及經過地方並搶劫馬牛羊數目如果屬實是長齡等前此奏報肅清盡爲虛捏殊出情理之外但揭帖內究係一面之詞亦難遽信那彥成接奉諭旨著卽馳驛前赴西甯嚴密確查據實具奏此事關繫邊疆重務不可稍有瞻徇隱飾况營馬搶去三百餘匹之多必不能掩人耳目原揭帖一件發交那彥成閱看並於該處營汛內查訪字識係何人造寫一經訪有端倪卽拏獲到案比對筆迹務得確實以憑根究至陝西巡撫印務著交唐仲冕暫行護理其未經審結各案交辛從益審辦盧

坤見已補授廣西巡撫著卽赴陝西署理巡撫印務俟程國仁到任後再行交卸起程來京請訓再前據長齡等奏助勒蓋一帶卽令察罕諾們汗移居克烏蘇一帶飭回阿里克大百戶住牧均各給予執照並於冬春兩季賞給該諾們汗及阿里克大百戶置備口糧銀各一千兩已降旨依議行矣朕近聞河北蒙古二十五旗內該察罕諾們汗較爲富強其在游牧處所往往首鼠兩端當大兵經臨之時卽督率番族依附官兵及大兵撤退之後仍復勾結野番乘閒搶劫實屬不安本分那彥成於青海情形較爲熟悉著一併密行訪查該諾們汗旗下見在有無勾結滋事之處查明設法妥爲安置務令安居游牧邊圉靜謐方爲妥善○乙卯諭各省佐貳委署州縣隨時專案報部○己未諭軍機大臣等長齡奏野番一千數百人復過河北搶劫察罕諾們汗牲畜並殺傷男婦數十人見已前往趕辦並稱察罕諾們汗不能抵禦亟須另籌防河事宜等語青海野番滋事前據長齡等奏報大加勦戮黃河以北全就肅清並籌議善後章程賞給察罕諾們汗等銀兩以資防守彼時該督等所保人數過多朕因其辦理迅速槩予准行並未斥駁一人其所議章程亦俱准令照辦乃撤兵甫經兩月該番賊復過河北搶掠可見前次辦理不善所奏該處地方全就肅清之言竟不可信卽此次具奏野番一千數百人殺傷男婦數十人亦恐不止此數前因該蒙古等不能固守籬籬該督以察罕諾們汗移居助勒蓋一帶足資防守每年賞給銀兩置備口糧其向年會哨之兵卽行停止今又稱察罕諾們汗不能抵禦另議防河是長齡於此事毫無把握致前後所奏自相矛盾該督見已前赴西甯著卽會同松廷督兵妥速勦辦務期邊圉迅就肅清俾番賊知所

傲懼不敢再出滋擾尙可稍贖前愆儻仍辦理不善致番賊於撤兵後又復前來肆行搶劫擾及內地惟該督等是問恐不能當此重咎也○庚申賞已革禮親王昭槤宗人府主事○予故前任閩浙總督董教增祭葬諡文恪○丙寅諭總管內務府大臣等本年順天府屬二十四州縣內據報被災者十八州縣此次謁 陵大差派辦車輛民力未免拮据著內務府將所屬各項備差車輛人役可裁減者酌量裁減其乾清宮等處總管首領太監等行李車輛人數亦令酌減實用車輛若干俟有確數奏明交順天府遵辦俾地方官豫備較易以示體恤嗣後仍照向例辦理該府尹等不得援此爲例○丁卯河南沁河溢命程祖洛勘辦○戊辰諭御史郭泰成奏請疏通河渠以工代賑一摺據稱直隸入夏以來大雨時行田禾被淹由河渠淤淺水無所歸如果河渠通暢田廬未必東華續錄 道光六 七

受傷年歲仍可豐稔等語疏通河渠以備水澇時宜洩流通固是該地方應行之事但今歲直隸一百四十三州縣被水者有八十州縣之多經朕特發帑金分投賑濟災黎計口授食待賑不暇又何忍藉此可緩之工使民力作若如該御史所奏以賑濟之帑金作興工之費用是未給民食先用民力使數萬飢民驅令枵腹從事大失朕拯恤窮黎之意且被災非一區疏通非一處直隸各州縣所屬河渠難以數計如盡使嗷嗷待哺之民赴功趨事實屬窒礙難行况天氣嚴寒伊邇小民衣食尙艱又迫以力役是未蒙賑而先受其擾也該御史不諳事體所奏紕繆斷不可行○諭軍機大臣等文幹等奏廓爾喀噶箕抵藏呈遞該國王寄來稟件並面陳籲懇情形前據文幹等奏廓爾喀呈進表貢當經降旨准其贖遞茲該國王籲稱其祖拉特納巴都爾曾於乾隆年間蒙 賞給

寶石頂帶見未奉特旨不敢擅用等語廓爾喀國王輸誠向化著加恩准其戴用寶石頂帶至該國王爲其祖母懇求恩施該國王旣賴其祖母盡心撫養朕自必酌加恩賚俟該國噶箕等同國交令帶回其噶箕畢穆興塔巴該國王稱伊兒在年幼一切事務全賴辦理甚爲得力著加恩賞給三品頂帶用示朕懷柔遠人至意文幹等卽傳諭該國王遵照可也○改湖北竹山協洪坪塘千總爲白河口千總額外外委爲白河口貼防○庚午諭軍機大臣等那彥成奏遵旨前赴西甯查辦賊番復出肆掠一案據稱察罕諾們汗卽白佛僧亦卽蒙古二十五旗之一原牧在循化邊外後移居黃河之南今又潛住河北時與野番勾結爲奸移之則驅而爲賊留之則引賊作賊所論甚是那彥成於野番情形熟悉著卽交那彥成辦理必須籌畫萬全妥爲安置勿使仍前窩賊分贓方稱

東華續錄

道光六

八

至善其匿名揭帖字識務向各營汛訪拏正犯到案如比對筆蹟確有可憑雖該犯訐告得實亦按律治以應得之罪至所稱見屆九月西甯地方正值大雪封山之時未便議勦惟嚴飭各提鎮查明各卡隘山口額定兵數照例支給口糧柴薪派令副參各官帶赴各卡隘分紮駐守各提鎮來往會巡嚴密稽察使野番無由闌入內地並盤查漢奸代爲銷贓禁止商民私販茶葉火藥以防爲勦等語該野番本係烏合之眾糾聚搶掠止爲謀食果能實力防制使之無以爲生日久漸形窮蹙正自不勦而潰著卽照那彥成所奏辦理儻察看情形必須進勦俟明歲春融時再厚集兵力痛加勦辦斷不可存畏難苟安之見惟青海蒙古王公台吉等臣服已久迥非外夷可比若如那彥成所奏僅將各沿邊卡倫移駐官兵防守竟置該蒙古等於不問該野番等或於秋冬閒乘隙往彼

搶掠以致該蒙古不能自存亦非安邊撫馭之道况青海一帶爲
通藏要路去年卽有進貢堪布被劫之事如該野番等故智復萌
道路稍有梗阻殊屬不成事體那彥成亦不可不爲籌及也○撥
廣東江西解部銀二十萬兩備直隸賑需○辛未召長齡來京以
那彥成署陝甘總督由刑部
尙書署○是月給河南安陽等三縣直隸霸
州等二十二州縣山西歸化城薩拉齊二廳山東恩縣等三縣水
災口糧貸土默特被水蒙古口糧蠲緩山東高唐等四十一州縣
衛雲南鶴慶劍川二州災歉賦課緩徵齊齊哈爾城被水屯丁逋
糧

九月癸酉諭前因順天府屬被災州縣較多當降旨令總管內務
府大臣查明此次隨往謁 陵備差應用車輛酌量裁減茲據內
務府查明開單具奏各處隨往備差司員應用車輛減去一百四

東華續錄

道光六

九

十輛內廷需用車輛節省七十八輛共省減車一百九十二輛著
卽照所請行知順天府辦理朕軫念民艱於差役之中時寓矜恤
之意該府尹等自應仰體朕心實力奉行卽飭各州縣照此次減
定車輛數目備辦此外浮派車輛已派者按名發還未派者毋許
添派並著通行曉諭認真稽察如各州縣陽奉陰違書役仍復藉
差撞騙勒派病民卽據實嚴參懲辦如辦理不善一經告發或被
人揭參定將該府尹等一併治罪決不寬恕○甲戌撥通倉米十
萬石賑直隸被水州縣災民○乙亥諭軍機大臣等御史程裔采
奏豫省教匪朱麻子等由新蔡糾眾竄入阜陽滋事若非賴屬匪
徒勾結該犯等何敢輕入其鄉查潁州强悍成風爲匪黨遺逃淵
藪向有搶匪私梟雖非習教徒聲勢最爲聯絡風聞艾亨集在
阜陽縣西南距城一百六十里搶匪最多卽朱麻子等犯竄匿之

所艾亭集北十五里有馬家店盜首馬皮顯卽馬二係該處搶頭夥黨殆難數計縣西十里爲桃花店又西南約二十里爲章家寨約百里許爲地里城該處搶匪鹽梟成羣結黨最爲地方之害又該縣方家集以南卽河南息縣新蔡交界處所巨窩大盜伏處潛藏與搶匪肆行搶劫南汝光一帶客店往來行旅晨宵不敢放行此外如潁屬霍邱縣之三河尖與阜陽接壤三河尖之南十里爲臨水鎮與豫境毗連臨水鎮有著名土豪李復白一名業經獲案尙有李天定李振邦二犯日久未獲若不早拏恐習教之徒伏而未動者與搶匪互相糾結滋事等語皖豫兩省毗連處所向有搶匪私梟黨與甚多聲勢最爲聯絡節經地方官查拏懲辦淨盡如該御史所奏馬皮顯李天定李振邦等犯擾害閭閻必須及早捕獲見當按查餘匪之時該省文武員弁分布要隘會同堵拏該處

東華續錄

道光六

十

爲搶匪出入之區不難就地查緝以淨根株著孫玉庭孫爾準程祖洛嚴飭地方不分畛域密速按名掩捕無任遠颺仍須不動聲色不可稍涉張皇別滋事端總期匪徒淨盡大夥悉就殲除固不可株累無辜亦無許僅捕零星土匪充數務俾民間安堵卽土棍亦不戢自消方合思患豫防之道○以史致儼爲內閣學士兼禮部侍郎銜由詹事遷○成都將軍呢瑪善等奏提督桂涵帶兵勦辦果洛克賊番連獲勝仗情形得旨獎賚○丙子添設雲南永北營苗方大水井巴喇三汛裁戡戡汛移於阿喇喇○己卯諭都察院應奏控案遇有陳進事件無論有無違悖字樣俱准一併封奏○調張志緒爲江甯布政使戴三錫爲四川布政使○壬午姚祖同以儀工用項奏銷辦理謬誤降四品京堂○甲申諭向例簡放道府人員皆具摺謝恩因思副將係武職二品大員著兵部帶領引見

述旨後亦照道府例令該員自行具摺謝恩以備召見著爲令○
乙酉四川果洛克番賊平○實授嚴煥河東河道總督○丁亥鄭

國裕年老休致調陸言爲直隸布政使以楊健爲山東布政使調
盧元偉爲山東按察使以福祿爲直隸按察使由山東○戊子永

定河漫工合龍○庚寅以蔣攸銛署刑部尚書調陳若霖爲四川
總督李鴻賓爲湖廣總督以魏元煜爲漕運總督韓文綺爲江蘇

巡撫由刑部左○辛卯堵築山東德州及聊城夏津二縣漫口堰
隄○壬辰改雲南騰越直隸同知爲永昌府同知○癸巳召徐忻

來京調誠端爲福建布政使以史譜爲雲南布政使調魏元煊爲
江西按察使蘇成額爲四川按察使以邱鳴泰爲福建按察使由

西其業甫道選○丙申刑部等衙門議奏懲辦械鬪章程一造謀首禍之
人宜嚴行究辦一脅從下手之犯宜稍予從寬一斂財以備械鬪

東華續錄

道光六年

十一

買兇之積習宜設法嚴禁一審辦械鬪案件之地方官宜分別勸
懲從之○戊戌申禁生監包漕○庚子以程國仁爲刑部右侍郎

調盧坤爲陝西巡撫以成格爲廣西巡撫○是月給江西瑞昌縣
河南武陟原武二縣災民口糧屋費蠲緩雲南麗江縣江西瑞昌

縣河南武陟等六縣水災雹災額賦

冬十月壬寅朔諭圖齊前由軍功晉加子爵康熙年間追封一等
承恩公嗣於乾隆四十三年改爲三等承恩公見在公爵卽係舒

明阿承襲本年十一月內舉行冊立皇后典禮皇后之父舒明阿
應照恭阿拉之例封爲一等侯惟舒明阿見已承襲公爵此次應

封侯爵著該旗卽將舒明阿之子俱行帶領引見候朕簡定一人
合其承襲○癸卯諭朕恭閱 皇曾祖世宗憲皇帝實錄內載雍

正四年十月奉 聖諭有謂朕進人太驟退人太速者朕在藩邸

時從未與外廷諸臣往還卽認識者甚少及卽位後有內外員缺甯能不用人乎而素無認識之人不得不博採旁求以用之及用之而徐觀其人實不可用則不得不更易之故大自督撫提鎮至於道府參遊州縣每一缺出苟不得其人朕將兵吏二部月捐翻閱再四每至中夜不寢必得其人方釋然於中此爲君之難實不可以言語形容者也等因欽此仰見 皇會祖勤求到治進賢如不得已之至意本日給事中張鑿奏稱督撫司道等官升調太驟各員履任未幾旋卽更調該員於民風土俗不暇周悉屬吏尙未徧識歷官之日少奔馳之日多胥吏乘新舊交代之際玩法舞文家人利本官歷任之多飽索規禮弊俱相因而至嗣後請俟數年後察看該員治效再爲升調等語所見未嘗不是惟是國家設官分職所以登崇俊良俾列庶位因地擇人權衡務求至當朕敬體

東華續錄

道光六

十一

上天付託之重恭釋

列聖寶訓之貽永思治益求治安益求

安一遇督撫司道缺出不得不廣諮博訪擇其可用者而用之此朕不得已之苦衷卽如督撫中孫玉庭阮元琦善等何嘗不久任封圻昨盧坤由甘肅藩司簡放廣西巡撫朕因其於陝西情形較爲熟悉因畀以陝西巡撫之任於簡放之中仍寓人地相需之義如果二三年後各督撫司道俱能盡心職守吏治民風蒸蒸日上朕又何嘗必欲更調令該督撫等僕僕道途爲耶至所稱督撫兩司滿漢參用當無分畛域以免更調之煩朕已早論及此惟期大小相維共臻上理凡在臣僚皆朕股肱心膂視同一體原不豫設成心意存防檢如該給事中所云也將此通諭知之○乙巳賜張雲亭等五十五人武進士及第出身有差○添設內務府掌儀司贊禮郎七員給九品頂帶○丁未以三等承恩公舒明阿子裕寬

襲一等侯爵○署陝甘總督那彥成奏報到任得旨所奏俱悉自謂知識淺疏忽舛誤未免過當卿受 皇考屢次訓迪深恩刻不可忘惟思一力奉公爲國宣猷從前不逮之處全行湔洗卿之敢於任事不與世俗浮沈朕所素知勛卿者所謂不自大其事不自尙其功高明柔克永矢毋忽以期常承恩眷佐朕以治也懷之慎之○已酉諭前因青海野番滋事特令長齡帶兵前往督辦嗣據奏報黃河以北全就肅清並籌議善後章程具奏槩予准行迨甫經凱撤野番仍復過河搶掠當降旨交那彥成前往確查茲據查明長齡自凱撤後又有野番十餘族移回河北貢額爾蓋及鹽池一帶插帳至搶掠蒙古雖較前稍熄然自夏徂秋尙未盡絕等語長齡前在青海勦辦野番兩次大獲勝仗朕因其辦理迅速加恩賞戴雙眼花翎保奏各員亦未經斥駁乃凱旋甫經兩月番賊

東華續錄

道光六

七

復過河搶掠辦理不善咎無可辭長齡著撤去雙眼花翎准戴用單眼花翎仍交部議處尋議革職得旨著加恩改爲降四級留任○諭軍機大臣等那彥成奏確查青海見在情形並酌安卡隘嚴拏漢奸一摺據稱長齡勦辦野番屢獲勝仗所奏尙非虛捏惟撤兵太早且察罕諾們汗實係野番中禍種雉媒長齡反爲捍護草率輕忽已明降諭旨將長齡撤去雙眼花翎准戴單眼花翎仍交部議處矣野番冥頑成性蒙古虐其屬下其屬下反投野番謀生因導引搶掠其主至內地歇家奸販貪利潛往貿易無事則教引野番漸擾邊境有兵則潛與報信近年番勢漸張弊實在此蒙古回民漢奸皆能爲番子衣冠始僅句結鄉導繼或冒名肆掠欲除外患自應先絕內奸其西甯之丹噶爾哈拉庫圖及貴德循化巴燕戎格各屬西漢民人並熟番私販茶葉火藥口糧潛往貿易者

悉屬漢奸至各屬蒙古番子歐家擇山僻處所私開小店銷變賊物亦所不免此等回民熟番與內地奸民搶劫成風甚屬可慮那彥成所奏乃正本清源之道然必須辦理周妥計出萬全以期一勞永逸不可稍有疏失其請分飭提鎮查明毗連番地卡隘通衢要路酌增防兵多不過百名山僻小路增防兵二三十名其路徑叢雜卽空斷以防偷越野馬川一帶暫駐備兵數百員名俱照所議行如番賊仍前占踞明歲春融卽厚集兵力痛加驅勦至屯田一節俟河北肅清後再行妥議具奏其各旗戶下相近察罕諾們汗居住及與野番雜處者率皆從賊之人不值復爲庇護所有蒙古口糧向准在青海大臣衙門起票換買惟每票定限一年繳銷見據那彥成與松廷籌議著照所請每票准用一次所請用若干口糧卽註明糧數人數及牲口數目按程途遠近定以期限繳銷

東華續錄

道光六

十四

至另摺奏查辦匿名揭帖控告各款內惟蒙古貝子喇特納希第屬下被搶牛羊及察罕鄂博賣運米麵馱子被搶屬實其所稱西甯孳生馬廠及涼屬內地村莊被掠之處均屬子虛至番賊搶劫肅州孳生馬廠並蒙古人等牛羊一節肅州蒙古並無報案該廠弁兵尙未提到情節未能遽定著該督卽提到該廠弁兵嚴行確審如果虧短馬額捏報被搶卽將該鎮及牧弁等嚴參至所控西甯馬廠涼州村莊二案見雖查無其事仍恐該管員弁匿報在先狡不吐實俟獲犯再行嚴訊至造匿名揭帖之人於賊匪分股何由得知其爲甘涼一帶隨營未得好處之弁兵匿名訐告已無疑義著那彥成分飭嚴密查訪務獲按律懲辦○實授那彥成陝甘總督蔣攸銛刑部尙書○兵部左侍郎常福以病免○錢臻以年老休致調戴敦元爲湖南布政使以廉敬爲山西布政使

前任西甯辦事

跋○庚戌諭御史余文銓奏請革除部費名目一摺所奏是六部綜理各省事件應准應駁自有定例原不許私自關通若該督撫任聽所屬向部中書吏賄託營求成何政體據該御史奏稱外省每遇奏銷地丁則向州縣提取奏銷部費報銷錢糧則提取報銷部費並有由首府首縣行用印文催提者甚至調一缺題一官請一議敘及辦理刑名案件皆以部費爲詞有打點照應招呼幹旋各名目河工軍需城工賑恤諸務則曰講分頭所需部費自五六萬至三四十萬兩不等此等銀兩非先事於公項提存卽事後於各屬攤派上司既開通融之門屬員遂多浮濫之用剋扣侵欺弊端百出且事後攤派各州縣馬肯自出己貲勢必橫徵苛斂虐取於民在部中書吏受屬舞弊誠所不免而外省司書幕友局員串通京師姦猾藉名部費詐騙分肥者尤居十之七八殊於國計民

東華續錄

道光六

七

生大有關繫自應嚴行飭禁著通諭各直省督撫查明所屬如有倡爲部費名目者卽指名參奏並根究京中賄託何人一併從嚴懲辦其事有今昔情形實在不同者接奉部駁後據實奏明辦理一切部費名目槩行禁止以除積習而飭官方○王子賞候補四五品京堂朱勳三品頂帶休致○命候補三品京堂陳桂生候補四品京堂曹六興程贊清均以原品休致○乙卯 上以釋服奉

皇太后啓鑾謁

昌陵○免經過地方額賦十分之三○丁巳

諭刑部奏直隸高邑縣生員李廷珏民人王伸等呈請捐銀爲擬遣已革高邑縣知縣范澍贖罪雖據訊明該生員等因范澍居官甚好民情愛戴願爲捐贖難保非授意屬託此風斷不可開著不准其贖罪○己未 上謁 泰陵 泰東陵 昌陵○命嗣後臨

幸南苑靜宜園均無庸呈進食物○庚申 上謁 昌陵行釋服

禮回變○守護 昌陵領侍衛內大臣景安尙書李奕疇都統慶

溥均予休致○壬戌轉恩銘爲刑部左侍郎以奎照爲刑部右侍

郎右署工部○以敬徵爲工部右侍郎左署刑部○癸亥 上奉 皇

太后還京師○諭向來回鑾進宮時內廷外廷各王公從無呈進

食物之事乃本日成親王呈進食品十六盒甚屬錯謬著卽發還

嗣後如不知悔改仍率意妄行朕惟有按例處治不能稍從寬貸

也其懍之○甲子諭呢瑪善等奏果洛克唐凹等寨番賊素稱強

悍近年糾搶分贓之案甚多經呢瑪善等調集漢土官兵疊次擒

獲土目父子及著名兇賊悉行就地正法各路土目番眾咸知畏

懼見在揀擇妥實安分之人承充果洛克土目邊境肅清官兵凱

撤辦理迅速甚屬可嘉除桂涵前已降旨交部從優議敘外呢瑪

善蔣攸鈺辦理此案調度得宜均著加恩交部議敘○申禁收漕

東華續錄 道光六年 十一

州縣書役侵漁各弊並禁漕總名目○是月賑甘肅河州安徽宿

州直隸霸州等四十三州縣江蘇海州湖北天門鍾祥二縣水災

貸給盛京廣甯縣山東濮州等五州縣黑龍江城庫木爾等二站

水災口糧屋費有差蠲緩甘肅靜甯等六州縣河南儀封等二十

三廳縣湖北沔陽等十三州縣山東濮州等五十一州縣衛直隸

通州等十八州縣江蘇海州等三十四廳州縣衛被災新舊額賦

墨爾根布特哈舊欠糧石長蘆及江蘇松江府屬正溢鹽課

十一月壬申定恩封王公等佐領額數○丙子諭前據太常寺奏

孝穆皇后升祔 奉先殿前期告祭儀注請御龍袍龍袿乘禮

輿經朕查嘉慶年間記載係用龍袿藍袍並未乘禮輿當卽傳詢

該堂官據奏稱係比照道光元年三月二十八日 皇考仁宗睿

皇帝升祔 奉先殿行禮儀注實屬錯誤該堂官職司典禮具奏

事宜自當敬謹確查舊例卽例無明文亦應先期奏明候朕酌定
乃既不查案又不請旨妄行比擬呈進儀注大失敬謹之義且嘉
慶六年八月二十一日 皇妣孝淑睿皇后升祔 奉先殿行禮

儀注具有成案至今不過二十餘年該衙門何以竟無從檢查可
見該堂官平日漫不經心遇事又不認真考覈事關告祭禮儀非
尋常舛錯可比太常寺堂官俱著交部嚴加議處內務府大臣隨
同畫彙未經覆查亦屬疏略俱著交部察議○雲南布政使史譜
奏請入覲得旨前旨甚明必欲來京何意全不以邊疆爲重矣○
丁丑添設西甯鎮海營副將都司守備各一千總把總各二外委
七哈拉庫圖爾營都司把總各一鎮海堡千總一大通營遊擊一
黑石頭汎千總一雙俄卜營守備把總各一外委二黑林口汎把
總外委各一武勝溝汎把總外委各一哈瑪爾托亥營都司把總

東華續錄

道光六

十七

各一外委二撥科營守備把總外委各一裁鎮海營遊擊鎮海堡
守備外委大通營副將都司黑石頭汎把總各一撥入新添額內
餘在西甯鎮標前中左右後五營北川營甘肅提標甯夏涼州河
州肅州各鎮標照數移撥○堵築河南武陟縣韓村漫口心隄○
辛巳諭前因太常寺呈進告祭 奉先殿儀注並未詳稽舊例又
不聲明請旨妄將元年告祭作爲比照若加深究則罪在不赦矣
以致此次典禮幾至輕重失儀試問伊等所司何事乃漫不經心
實屬輕率錯謬之至當經交部嚴加議處本日吏部具奏照溺職
例議以革職實屬咎無可寬姑念閣署堂官更換乏人加恩稍從
末減穆克登額著降補吏部左侍郎革去紫禁城騎馬明志色克
精額著降補內閣學士伊二人替讀尙好加恩仍兼太常寺行走
均著拔去花翎長旺曹師曾著降爲四品頂帶明安泰著降爲五

品頂帶長旺曹師曾明安泰均各罰俸二年仍留原衙門之任王
麟著署理禮部尙書管理太常寺鴻臚寺事務其樂部事務無庸
兼管舒英著補授理藩院右侍郎仍兼太常寺行走總管內務府
大臣英和文孚臚恩穆彰阿廣泰俱著加恩改爲降一級留任准
其抵銷○壬午申諭各督撫毋得勒令州縣接收虧空代爲彌補
○癸未諭顏檢奏各鎮應值年班可否飭令進京叩賀一摺向來
每遇元旦直隸各鎮同密雲副都統輪派二人於封印後來京作
爲年班惟念該總兵等俱有彈壓地方之責著自本年爲始所有
大名正定宣化三鎮及密雲副都統每歲輪班到京祝賀之處永
遠停止該總兵等其各盡心職守加意操防用副委任○乙酉以
玉麟爲禮部尙書慶保爲左都御史由部○丙戌 上奉 皇太
后懿旨立 繼妃佟佳氏爲 皇后封側福晉富察氏爲 恬嬪

東華續錄

道光六年

十六

那拉氏爲 和嬪翌日頒詔天下覃恩有差○陝甘總督那彥成

奏謝實授恩得旨所奏均悉虛心實行四字乃朕自勵者也特書

與卿時加省察無忽○戊子起松筠爲光祿寺少卿○辛卯諭元

旦令節萬壽慶辰王大臣等呈遞如意藉伸頌祝應示以限制自

明歲元旦爲始親王郡王無論內廷外廷行走俱准呈遞貝勒貝

子公惟內廷行走者准其呈遞軍機大臣內務府大臣無論品級

俱准呈遞南書房翰林惟一二品大員准其呈遞上書房行走總

師傅師傅遇萬壽之年亦准其呈遞其餘年分槩不准呈遞大學

士尙書領侍衛內大臣俱准呈遞都統在內廷行走者方准呈遞

侍郎副都統俱不准呈遞御前侍衛一品者准其呈遞乾清門侍

衛槩不准呈遞年班來京文武大員亦惟一品者准其呈遞著通

行曉諭其各恪遵無違○移建湖南省城城南書院頌 御書扁

額○壬辰 上詣 大高殿祈雪○命江西貧民質穀無庸官爲
經理○丁酉以冊立 皇后禮成恭上 皇太后徽號曰 恭慈
康豫皇太后翌日頒詔天下覃恩有差○是月賑安徽宿州等七
州縣及屯坐各衛河南武陟縣水災旱災給安徽泗州等八州縣
甘肅河州等十一州廳縣災民口糧蠲緩安徽宿州等十七州縣
及屯坐各衛河南武陟陽武二縣甘肅狄道等六州廳縣江西南
昌等七縣並南昌九江二衛湖南澧州浙江海甯等四州縣被災
新舊額賦長蘆被水引地兩淮板浦等九場被水新舊額賦

十二月癸卯加築江南祥符五瑞等處閘壩○乙巳諭各督撫慎
覈州縣不得率請改教○丙午 上再詣 大高殿祈雪○丁未

諭軍機大臣等陝甘總督那彥成等奏察罕諾們汗率屬悔罪願
歸河南原牧見押令過河並妥爲清釐安插一摺察罕諾們汗夥
東華續錄 道光六年 十九

同野番句結漢奸作賊已久此次經該督將糧茶斷絕立見窮蹙
願歸原牧不勞兵力不延歲月易於反掌辦理認真實屬可嘉之
至該諾們汗既已悔罪投誠自可寬其一綫其屬下頭目人等向
不遵奉約束自應加以嚴懲經該督將同來之圖薩拉克齊小完
冲等重責鎖禁斥革並將該旗所管二十族分爲左右兩翼照該
旗蒙古舊例每翼設員管束稽查擇誠實頭目另行充補其諾們
汗獻出之搶劫蒙古賊犯丹達勒等三名業經分別懲辦並委署
副將劉印景等押令渡河惟渡河以後必須妥爲安插俾約束嚴
明互相鈐制令搶劫故智不敢復萌方爲經久善策不可將就蕪
事以致別滋事端又另摺奏清釐河南番族並河北番賊情形見
在河南循貴番賊尙知安分自應趁其畏懼之時立法約束該督
見傳到各番眾面加曉諭如各族內有逃至河北句結賊番者卽

著擒獻無許隱匿其河北野番過河以後查係伊等族內之人自行管束如係漢奸立即搦獻所有各番族頭目准其按計戶口百戶一人每管百戶至三百戶歸一千戶管理百總一人每管五十戶兩百總歸一百戶管理十總一人每管十戶至五十戶歸一百總管理令其公舉誠實公直之人充補其千戶等著照例給予頂帶俟三年無過發給印照號紙作爲實缺至易換糧茶章程每年准買兩次由千戶給呈該廳營給予照票如實係良番方准發鋪照買所需布縷等項亦於票內註明一同換買此時河北野番勢成孤立該督仍嚴查卡隘糧茶趕籌肅清至河北番族應趁其過河之時查明安插均著照河南之例辦理俾不至疑懼該督仍察看情形再行妥議具奏又另摺奏審擬漢奸盤踞務盡根株並籌定巡防會哨及稽查山內保甲章程首犯麻木溝經該督等嚴訊

東華續錄

道光六年

三十一

多在甘州之邊境野馬川一帶結黨盤踞其中之野牛溝八寶山等處產有金砂奸民潛行偷挖見據該督全行封禁窯洞窩鋪槩予填塞拆毀所辦甚是其麻木溝等犯供出夥黨除見獲各犯歸案辦理外卽飭屬迅速嚴拏務獲無任漏網所有沿邊失察文武各員見當緝拏喫緊之時如能獲要犯尙可功過相抵儻仍前疲玩著卽嚴參治罪其所請提鎮副參帶兵會哨道府州縣編查保甲俱著照所議行至麻木溝等犯著暫緩正法俟續拏餘黨逐案質審再行辦理又另片奏漢奸私歇例無明文著照所請嗣後西甯地方拏獲私歇家除番有不法重情實犯死罪外其但在山僻小路經年累月開設私歇家者將爲首之犯照私通土苗例擬發邊遠充軍爲從之犯擬杖一百徒三年所有見獲各犯卽照此例嚴辦○戊申申諭海口各關津嚴拏夾帶鴉片煙○庚戌諭程祖

洛奏勅明漳河北徙斷難復令南趨請無庸堵築一摺本年漳河盛漲安陽之馮宿村口門漫水直趨東北由內黃之慶豐莊入衛茲據程祖洛查明慶豐莊以上衛水所經無漳水頂阻之患不至再由袁村旁洩可期全行濟運漳衛分流前此歲淤歲挑之竇公河鹽漕運道不至再淤可省挑費被衛淹浸之安陽等縣地畝可以漸次涸復漳河關繫直豫二省民田運道著派大學士戴均元馳驛前往河南會同程祖洛相度該處形勢是否新河所經均極通暢其常善至田市二十餘里應如何疏濬之處悉心妥議據實具奏○癸丑 上以祈雪未應命再度禱七日○諭嗣後各省協

領俸滿來京引見除未經記名者卽令回任外其記名之員著於

述旨後具摺謝恩豫備召見著爲令○以慶保爲熱河都統賞松

筠二品頂帶爲左都御史由光祿寺少卿遷○琦善丁憂調程含章爲山

東華續錄

道光六

五

東巡撫以陳中孚爲廣東巡撫楊國楨爲河南布政使吳廷琛爲

雲南按察使由直隸清河道遷○甲寅諭本日軍機大臣議駁給事中袁

銑奏嗣後遇有慶典請無議蠲一摺所議甚是我朝 列聖相承

深仁厚澤培養元元恤災減賦不惜數千萬帑金隨時舉行至遇

慶典之年復將各省市漕民欠分別蠲除廣布恩膏有加無已煌

煌 合典允宜遵循勿替該給事中輒云遇有慶典總無議蠲是

欲改變舊章使朝廷之膏澤不下逮於閭閻大乖行慶施惠之義

給事中袁銑言利亂政妄更 祖宗成憲致朕於不仁不惠是誠

何心豈可復任言官著以六部主事降補○丙辰調穆克登額爲

戶部左侍郎轉博啓圖爲禮部左侍郎調舒英爲禮部右侍郎以

耆英爲理藩院右侍郎由內閣學士遷○庚申免江蘇安徽嘉慶二十三

年以前民欠攤徵銀三十三萬三千六百餘兩○辛酉諭軍機大

臣等帥承瀛奏委員覆查南田封禁地方一摺浙江甯波台州二府聯界之南田地方自前明封禁至今四百餘年無業遊民藉探捕爲名潛往私墾見在十有八畝計墾戶二千四百有零已墾田一萬六千七百餘畝其始由豪強占踞招人墾種計畝收租名曰老本以致愈墾愈多此等墾戶若槩行驅逐則實在無籍可歸之貧民必虞失所恐致別滋事端若任其占踞潛匿或更從而影射招邀則紛至沓來匪徒溷迹其中無從辨別人數愈眾措置愈難該撫見飭拏著名老本賴一富等二十名嚴行究辦並出示剴切曉諭檄委甯波府督同該委員等前赴南田復行逐畝查勘該處戶口地畝一俟得有確數著卽相機籌辦務出萬全會同趙慎畛妥議章程具奏俾貧民不至流離失所而匪徒亦不至匿迹其閒方爲至善○壬戌 御製養正書屋詩文集序曰予自六歲入上

東華續錄

道光六

三

書房受誦經史稍長卽於講肄之暇留意篇章積累歲時漸成卷帙非欲雕琢曼詞蓋陶冶性情學不廢藉以自勵而已庚辰孟秋驚承 大命仰蒙 皇考付託深恩仔肩鉅重臨軒以來兢兢業業惟慮民生之未裕政事之未醇用人之未當曩昔所著未暇整次茲內廷諸臣合詞陳請刊布予潛邸時養正書屋詩文集且以我 皇祖樂善堂集 皇考味餘書室集皆於 御極之初頒示海內援請再三卻之不可予乃推述養正之意以序之養正書屋者 皇考受寶初元 御書以賜園居之額也易曰蒙以養正聖功也又曰君子以果行育德王弼注育德者養正之功蓋童蒙之時天理至正渾然無私惟賴教者之啓發則至正之理常保其固有而無所失此養正必原於育德也德既正則見諸行事者亦無不正是果行又爲育德之效作聖之基所由始卽齊治均平之

道所由推也予弱冠卽蒙 皇考殊眷默定儲位而養正二字實
肇錫於紀元之始仰見 訓迪深衷所以敦勉藐躬者至深且遠
繼自今懍承 統緒敬繹 前言倍加感悚則知天地養萬物聖
人養賢以及萬民皆不外此大哉 聖人之言豈僅爲發蒙之初
基云爾哉是集始乾隆乙卯至嘉慶庚辰刪繁去複得詩若干首
文若干篇付之剞劂用志歲月且闡述我 皇考賜額之至意庶
顧諟常存以循守於勿替焉爾○丁卯諭朕於明年正月駐蹕圓
明園內閣六部九卿衙門遇御門理事及本衙門帶領引見該班
奏事日期均著輪留堂官一人在署辦事不必全行赴圍著爲令
○戊辰諭那彥成等奏玉舒番族每歲馬貢折銀請循舊例交納
一摺青海大臣衙門所管玉舒番族向有馬貢折銀由該番目自
赴西甯交納嗣於乾隆三十一年改派主事通丁前往催收各番

東華續錄

道光六

三

族供應較繁殊滋擾累那彥成等請循照舊例辦理用示體恤著
照所請嗣後此項貢馬折銀著仍循舊例責令該總營千百戶等
照數湊齊於每歲九月間交該貿易番目自赴西甯交納仍著青
海大臣會同西甯鎮派員兌收貯庫所有主事通丁催徵之例永
行停止至該主事前往會盟之年如有自備土儀致送番族及客
商私帶貨物一併查明究辦以除積弊○諭軍機大臣等那彥成
等奏審明裝番肆劫之重犯卽行正法一摺此案麻木溝等假裝
野番騎馬持械肆行搶劫不法已極那彥成等業將先後拏獲各
犯審明按律辦理各案逸犯趙牙信韓百林趙五等仍著開列年
貌住址嚴飭各該屬嚴緝務獲無致一名漏網其黃魁添蔣家娃
二犯訊明均止疊次行竊並未與麻木溝等夥搶應分別擬軍著
卽照例咨部覈辦至所稱二十四旗中惟郡王沙克都爾屬下偷

竊搶劫之案爲多甚至其台吉藏根等均犯搶劫又貝勒尖巴禮屬下搶劫亦多擬俟查明將該王貝勒斥革另議承襲以示懲戒等語蒙古等被漢奸勾引竊劫犯案滋多該郡王貝勒不能嚴加約束咎有應得如果查明實有參賊窩贓確據則是該郡王等作奸犯科不遵法律自應從重懲治若其咎止於失察遽將該王貝勒斥革另議承襲該督等雖爲整飭邊務起見但似此辦理未免過當不足以服蒙古之心著那彥成等詳悉斟酌該王貝勒於所屬竊劫之案是否僅止失察務須查明定例奏明辦理不可稍有偏倚○己巳諭葉世倬奏開復道員未卽出考並敬陳管見一摺原任福建督糧道吳箴緣事降調例應出具考語送部引見乃本日葉世倬奏請嗣後如有前任內督銷商辦鹽引未完及一切公罪處分例干降調凡係特簡道府部議上時於本內聲明請旨並

東華續錄

道光六

五

敕督撫密查如實係廉正之員免其開缺等語國家立賢無方而考課甚嚴豈容驟更成例朕徵敘官方升降黜陟一秉大公並未嘗豫設成見若如該撫所奏是特用人員於前任一切處分竟可置之不問甚至例干降調亦可以詢問平日居官了事則簡拔各員皆可倖逃吏議非特無以示懲勸並恐開奔競之門於吏治人心大有關繫葉世倬率爲此奏變更舊例示天下以不公是誠何心想老詩不能承受國恩矣葉世倬著傳旨嚴行申飭所奏不准行○是月給直隸大城縣水災口糧貸直隸駐紮災區兵丁餉銀蠲緩直隸隆平等三縣江蘇山陽等四縣水災旱災額賦○是歲朝鮮暹羅琉球來貢○會計天下民穀數各省通共大小男婦三萬七千二百四十五萬七千五百三十九名口各省通共存倉米穀三千五百三十五萬五千二百四十九石六斗三升四合九勺

